

DISSERTATIO PHILOLOGICO.  
JURIDICA INAUGURALIS.

DE

MALEFICIS ET MATHEMATICIS  
ET CÆTERIS SIMILIBUS.

QUAM,

ADNUENTE DEO TER OPT. MAX.

*Ex Auctoritate Magnifici Rectoris,*

D. FRANCISCI FABRICII,

S. S. TH. DOCT. HUIUSQUE FACULTATIS, UT ET ORA-  
TORIÆ SACRÆ, IN ACAD. LUGD. BAT. PROFESS. OR-  
DIN. SOCIET. REGIÆ ANGLIC. DE PROMOVENDO  
EUANGELIO IN PARTIBUS TRANSMARINIS SO-  
CII: NEC NON ECCL. LEIDENSIS PASTORIS.

NEC NON

*Amplissimi SENATUS ACADEMICI Consensu,  
& Nobilissimæ FACULTATIS JURIDICÆ Decreto,*

PRO GRADU DOCTORATUS,

Summisque in UTROQUE JURE Honoribus & Privilegiis  
ritè ac legitimè consequendis,

*Eruditorum Examini submittit*

PETRUS TOLLOZAN, Lugduno-Batavus.

*Ad diem 9. Martii 1736. hora locoque solitis.*



LUGDUNI BATAVORUM,

Apud JOH. & HERM. VERBEEK, 1736.

RECEIVED BY THE DIRECTOR  
OF THE BUREAU OF REVENUE

DEPARTMENT OF THE TREASURY  
WASHINGTON, D. C.

THE DIRECTOR OF THE BUREAU OF REVENUE  
WASHINGTON, D. C.

TO THE DIRECTOR OF THE BUREAU OF REVENUE  
WASHINGTON, D. C.

FROM THE DIRECTOR OF THE BUREAU OF REVENUE  
WASHINGTON, D. C.

RECEIVED BY THE DIRECTOR  
OF THE BUREAU OF REVENUE

WASHINGTON, D. C.

THE DIRECTOR OF THE BUREAU OF REVENUE  
WASHINGTON, D. C.

TO THE DIRECTOR OF THE BUREAU OF REVENUE  
WASHINGTON, D. C.

FROM THE DIRECTOR OF THE BUREAU OF REVENUE  
WASHINGTON, D. C.

RECEIVED BY THE DIRECTOR  
OF THE BUREAU OF REVENUE

WASHINGTON, D. C.

V I R I S  
*INTEGERRIMIS, SPECTATISSIMIS.*

D. JOANNI JACOBO TOLLOZAN,

APUD LEIDENSES MERCATORI FIDELISSIMO, PATRI MEO OPTIMO, INDULGENTISSIMO, OMNI FILIALI PIETATE NUNQUAM SATIS COLENDO.

D. JOANNI GASPARO TOLLOZAN,

D. SIMEONI PETRO TOLLOZAN,  
MERCATORIBUS FIDELISSIMIS, PATRUIS MEIS EXOPTATISSIMIS, PROPTER EXIMIAM MIHI PRAESTITAM BENEVOLENTIAM, GRATO ANIMO AC SINGULARI AMORE AD ROGUM USQUE PROSEQUENDIS.

*Hasce Studiorum Primitias ea qua par est reverentia.*

D. D. D.

PETRUS TOLLOZAN.



WATERBURY, CONNECTICUT

D. JOSEPH JACOBUS TOLLERAN

AND HIS WIFE, MARY ANN TOLLERAN  
OF WATERBURY, CONNECTICUT  
DO HEREBY CERTIFY THAT THE  
ABOVE NAMED

D. JOSEPH JACOBUS TOLLERAN

D. SIMON PETER TOLLERAN  
RECEIVED OF THE TOLLERAN  
AND HIS WIFE, MARY ANN TOLLERAN  
OF WATERBURY, CONNECTICUT  
THE SUM OF FIFTY DOLLARS  
FOR THE YEAR 1881

WATERBURY, CONNECTICUT  
JANUARY 1882

D. JOSEPH JACOBUS TOLLERAN




# LECTORI.



*si tenuibus & nullius pretii pagellis ambitiosas præfationes prætexere ridiculum mihi videatur, non possum tamen quin hic Lectorem pauca moneam. Cum casu in hanc materiam de Maleficis & Mathematicis incidissem, satis arrisit, nec enim injucunda, nec toties ac aliæ pertractata, videbatur. Non prius vero manus ad eam applicui, quam de ordine hæsitare cœpi. Omnes Artis Divinatoriæ species inquirere, ac singulatim exponere, non tantum Dissertationis Inauguralis modum, sed etiam vires meas in infinitum superabat. Ab altera parte Fragmenta quæ in Jure nostro circa hanc materiam reperiuntur non facile ad certa capita referri possunt, nec adeo multa sunt ut sibi invicem magnam lucem præbere queant. Tandem cum considerarem Leges quæ in Codicibus Theodosii & Justiniani extant, ordine Chronologico esse dispositas, multaque ad eas illustrandas ex Historia petenda, animum cepi rem ab initio ordiendi, ac fata Artium Magicarum & Mathematicarum ordine Historico a XII Tabulis usque ad Tempora ultimæ legis Codicis Theodosiani sub hoc titulo persequendi, & ad singula tempora, Fragmenta tam Pauli ac Ulpiani quam Imperatorum integra exscribendi. Ea vero quæ ad illorum explicationem tum ex veteribus Poëtis, Historicis &c. tum ex eruditissimorum Themidis Antistitum scriptis colligere potui, in speciem fere Commentarii subnectere constitui, ita ut me intra terminos Juris*



*Romani continerem aliorumque Populorum jus intactum relinquerem. Potuissent etiam hic quam plurimæ quæstiones tractari quæ moventur circa illos qui Artes Magicas exercent aut saltem exercere creduntur, veluti de Potestate Diaboli, de Vi Imaginationis qua aliquando miseri homines abrepti, putant se sacris abominandis interfuisse quibus nunquam interfuerunt, & similibus. Verum bene gnarus quam periculosum sit in aliena pecunia manus injicere, malui ab illis in totum abstinere, nec onus suscipere quod humeri ferre recusarent. Intra Jurisprudentiæ ac Historiæ limites ergo me recipiens plerumque cum Jurisconsultis & Imperatoribus nostris locutus sum, fidem eorum quæ de Magis traduntur aliisque similibus in medio relinquens. Illud præterea monitum volo me eruditionis laudem non captare; nihil boni hic invenies quod non a summis Jurisconsultis Gothofredo, Schultingio, Bynkershoekio mutuatus sim: quæ vero perperam scripta offendes ea procul dubio mea sunt. Illud unice conatus sum, omnia fragmenta quæ de Maleficis, Mathematicis, cæterisque similibus, in Jure nostro extant, colligere, justo ordine disponere, iisque brevem ac necessariam explicationem subjicere; cumque nihil dicere possem quod non jam dictum prius, summopere animum applicui, ne quid inutile aut quod nimis extra materiam evagaretur, afferrem, quod si præstiterim satis mihi gloriæ reportasse videbor.*



DISSERTATIO PHILOLOGICO.  
JURIDICA INAUGURALIS.

D E

MALEFICIS ET MATHEMATICIS  
ET CÆTERIS SIMILIBUS.

CAPUT PRIMUM.

*Quid sit Magia, & ejus fata apud plerosque  
Populos.*

§. I.

**D**uo præsertim hominum genera nobis consideranda  
veniunt. *Magi* qui vulgo *Malefici* dicuntur &  
*Mathematici*; hi varias sub se species continent.  
Multo autem facilius est enarrare quid circa *Ma-*  
*giam* statuerint veteres, quam liquido definire quid  
per verbum illud intellexerint; videbimus enim multas reli-  
gio-



giosas cærimonias, ab illis quæ Magis tribuuntur parum aut nihil differre nisi forte in sola animi destinatione. Quid Christiani per crimen *Magiæ* intelligant dubium non est, vulgo quippe ita vocantur *artes illæ supra humanam potestatem, quæ ex vi pacti cum Diabolo exercentur*. Non multum tamen ab hac definitione discrepare videtur sententia veterum; si enim loca in quibus *Magiæ* fit mentio perpendantur, ubique fere observare licebit, nihil aliud per *Magiam* intellexisse præter *artem quæcunque, quantumvis supra hominum vires, peragendi, plerumque ad malum aliquod conciliandum, vel saltem ad futuri indagationem, idque fere semper per inferorum numinum invocationem, aut sola vi carminum, herbarum &c.* Definitionem illam esse omnibus numeris absolutam non contendo, sed in re obscura & de qua forte non una fuit veterum sententia clarior ac quæ melius omnia complecteretur mihi non occurrit. Si quis aliam adhibere velit per me licebit, de singulis speciebus clarius infra dicemus.

*Mathematici* in genere videntur esse omnes qui *sine inferorum aut carminum ope, futura prædicere pollicentur, specialiter vero ita vocantur qui ex nativitatis hora certisque figuris aut Astrorum inspectione futura prædicunt*, de illis etiam infra lateagemus. Jam quædam de Origine harum artium & earum facto apud varios Populos videamus, sed breviter semperque ad scopum nostrum Populum Romanum properantes.

§ II. Unde *Magia* originem trahat eleganter nos docet Plin. *Hist. Nat. Lib. 30. cap. 1. Auctoritatem ei (Magiæ) maximam fuisse nemo miretur quandoquidem sola artium tres alias imperiosissimas in unam se redigit. Natam primum e Medicina nemo dubitat, ac specie salutari irrepsisse, velut altiore san-ctioreque Medicinam: ita blandissimis, desideratissimisque promissis addidisse vires Religionis, ad quas maxime etiamnum caligat humanum genus. Atque ut hoc quoque suggererit miscuisse artes Mathematicas, nullo non avido futura de sese sciendi, atque ea ex cælo verissime peti credente, ita possessis hominum sensibus triplici vinculo ut hodieque etiam in magna parte gentium prævaleat & in Oriente Regum Regibus imperet. Pulchre ac vere*



vere rem exposuit Plinius, spes medelæ, vana superstitio, inanisque curiositas artes magicas in orbem invexere. At si quæretur, quis primus earum usum introduxerit, major erit difficultas. Plinius *l. c.* & cum eo omnes fere Antiqui Scriptores, uno ore *Zoroastrem* quendam tanquam inventorem *Magiæ* nobis tradunt. Si vero res perpendatur ingentes de eo invenimus diversitates, Alii Regem Bactrianæ, Nini Regis Assyriæ æqualem & hostem fuisse contendunt vid. Justin. *Lib. 1. cap. 1.* quod ab aliis refutatur, qui Persam fuisse nec diversum a celebri illo *Zoroastre* qui tot & tantas res in Religione apud Persas molitus est, asserere non dubitant; at illi iterum refutantur a Viro Doctissimo, Humfrey Prideaux qui in *Historia Judæorum Part 1. Lib. 4. p. 383. vers. gal.* luculenter & erudite ex libro Celeb: Hyde *de Religione Persarum* ostendit, famosum illum *Zoroastrem* demum tempore Darii Hytaspis vixisse, adeo ut nullo modo pro inventore artium Magicarum haberi possit. Verum ne multum laboremus de re admodum incerta nec magni momenti.

§. III. Apud Judæos artes Magicas incognitas non fuisse patet ex variis locis Sacræ Scripturæ vid. *Exod. cap. 7, 8. Deuteronom. cap. 18. v. 9. I. Sam. cap. 28, II. Chronic. cap. 33.* Sed de illis manus abstineamus, ne forte nobis a Theologis actio termini moti intendatur.

Babylonii & Chaldæi primi omnium Astrorum cursum inspexere & inde se futura prædicere posse jactarunt: cum vero Astronomia coli nequeat sine opera Matheseos ut major ipso- rum vaticinationibus fides adhiberetur, omnia se ex regulis certissimæ istius scientiæ definire profitebantur; unde postea omnibus qui illo vel simili modo futura se cognoscere gloria- bantur *Mathematicorum* vel ex gente cui originem debebant *Chaldæorum* nomen datum est, ut testatur Gell. *Noct. Attic. Lib. 1. cap. 9. & Lib. 14. cap. 1.* unde etiam Horatius *Lib. 1. od. 11. v. 3.*

*Nec Babylonios*

*Tentaris numeros.*

Magiæ etiam addictos fuisse colligi potest ex *Daniel. c. 2. v. 2.*

B

§. IV



§. IV. Nullibi vero ad tantum fastigium pervenit Magia quam apud Persas a quibus etiam nomen accepit. Notum est Magos in regno Persarum fuisse viros nobiles ac scientia præditos qui sacris præerant, ritus eorum explicabant, ita ut sine illis sacrum nullum posset peragi, recteque Apulej. *Apolog. p. m. 290.* *Persarum lingua Magus est qui nostra Sacerdos.* Haruspicinam exercebant, omniaque media futuri cognoscendi avide prosequerantur; penes illos erat omnis Theologiæ ac Philosophiæ scientia, & magno honore colebantur, in tantum ut ipsis cura educandæ regiæ proles committeretur. Horum scientia certæque ipsis peculiare sententiæ in quibus ab aliis discrepabant, Magia vocabantur, de quibus hic differere non vacat; late de illis agit Briffon. *de Regno Persar. Lib. 2. cap. 52. & seqq.* & accuratius Prideaux loco supra laudato. Cum vero hujus Magiæ pars non contemnenda posita erat in Arte Divinatoria, alii Populi qui Persas odio prosequerantur, hoc nomen dederunt artibus nefandis eorum, qui sub prætextu Divinationis etiam maxima scelera perpetrabant. Odium illud duplici de causa oriebatur. Prima quod apud Persas nuptiæ incestuosæ licitæ erant (de qua re vid. farraginem autoritatum quam collegit Oisell. *ad Caj. Inst. Lib. 1. Tit. 4. §. 1.*) in tantum, ut si Catullo credamus, Magus nasci oporteret ex conjugio inter matrem & filium.

*Nascatur Magus ex Gelli matrisque nefando*

*Conjugio, & discat Persicum Haruspicinum.*

*Nam Magus ex matre & gnato gignatur oportet,*

*Si vera est Persarum impia religio.*

Quam doctrinam, cum omnes fere populi detestati sint, mirum non est, si Magos odere. Secunda ratio est, odium quo Magi & omnes Persæ, imagines ac simulacra Deorum prosequerantur; nullas enim apud se statuas habebant vid. Briffon. *de Regno Persar. Lib. 2. cap. 28.* Et quando Persæ Græciam invaserunt omnia fana ac Tempia fuere combusta, odio statuarum, præter sola Apollinis in Insula Delo, & Dianæ Ephesi, quia in illis Sol & Luna maxima Magorum numina colebantur, teste Cicerone *in Ferr. Lib. 1. cap. 18.* Si duas  
has



has causas jungamus in proclivi erit ni fallor rationem reddere quare nomen Magiæ adeo factum sit infame ut eo insignirentur homines maxima scelera perpetrantes & impissimis superstitionibus dediti.

Apud Græcos artes Magicas usitatas fuisse patet ex innumeris Autorum locis, quorum multa collegit vir magnæ eruditionis Petrus Bayle *Reponse aux Questions d'un Provincial* Tom. I. p. 569. ed. in fol. maxime autem in usu erant apud Thessalos, adeo ut mulier Thessala sæpe unum ac idem cum saga apud Poëtas, significet.

§. V. Pervenimus jam ad Romanos, ad quos pertinet hujus Dissertationis institutum. Libera Republica de Magicis artibus non multum fuit cautum, sed accerrime in illas insurrexerunt Imperatores, ut postea videbimus. Antequam autem fata Magiæ & Mathematicæ usque ad tempora Pauli ac Ulpiani investigemus unam hic addere libet observationem, nempe quod ex ipsis ritibus ac unice inspectis difficile fuerit apud veteres, dignoscere an sacrum fuerit Magicum nec ne; quam plurima enim sacra publice exercita ac probata adeo cærimoniis Magicis similia erant ut ne ovum ovo similis, quod recte ostendit vir jam laudatus Bayle *dans les Rep. aux Quest. d'un Provinc.* p. 580. ibique exemplum adducit sacrorum Dæ Tacitæ quæ describit Ovid. *Fast. Lib. 2. v. 571. & seqq.* cui addi potest aliud exemplum a Viro illustri prætermisum, verum æque notabile, nempe *Lemuralia* itidem descripta ab Ovid. *Fast. Lib. 5. vs. 420.* Putat ergo V. C. non aliter veteres distinxisse inter actus Magicos & ritus quosdam religiosos quam per consilium, & animi destinationem qua adhibebantur. Si ex. gr. Deis inferis sacrum fiebat mali infligendi hominibus, bestiis, graminibus &c aut animum ad libidinem deflectendi gratia, Magicum videbatur, si vero ad publicam utilitatem aut simile quid Pium & Religiosum erat. Recte se habere hanc observationem facile concedo & passim in hac Dissertatione observare licebit, fere semper Magos punitos fuisse, non tam propter professionem artis Magicæ quam propter animi destinationem, aut crimina quæ perpetrabant. Verum ut hoc obiter notem,



miror, virum acutissimi ingenii ex propria observatione non perspexisse, quare sacra descripta a Virgilio *Æneid. Lib. 4. v. 483.* Magiæ tribuantur; ea vero quæ a Sibylla peraguntur in *Lib. 6. v. 243.* non item; fatetur enim se hujus rei rationem reddere non posse. Sed sacra illa Didonis peragi debebant eo animo, ut iter *Æneæ* impediretur, vel saltem Didonis amor solveretur ut ipsa ait *vs. 478.*

*Inveni germana viam gratarve sorori*

*Quæ mihi reddat eum vel eo me solvat amantem.*

Quæ omnia contra fata Deorumque voluntatem ideoque impia erant. Sacra vero a Sibylla peracta eo unice tendebant ut *Æneas* fata sua facilius perageret, quod non modo permissum, sed & laudabile piumque videbatur.

## CAPUT SECUNDUM.

*Fata Magiæ & Matheſeos apud Romanos usque ad Tempora Pauli & Ulpiani.*

### §. I.

**A**ntiquis temporibus jam damnatas fuisse artes Magicas apud Romanos innuit Servius ad Virg. *Æneid. Lib. 4. v. 492.* ubi Dido.

*Testor Chara Deos, & te germana, tuumque*

*Dulce caput, magicas invitam accingier artes.*

Servius autem notat Magicas adgredi invitam quia cum multa sacra Romani susciperent semper Magica damnarunt. Probrosa enim ars habita est ideo excusat. In Legibus XII. Tabb. prohibitum erat ne quis fruges excantaret, ceu patet ex verbis Senecæ *Quæst. Nat. Lib. 4. Cap. 7.* Apud nos in XII. Tabb. cavetur ne quis alienos fructus excantassit. Rudis adhuc antiquitas credebatur & attrahi imbres cantibus & repelli: quorum nihil pos-



posse fieri tam planum est ut hujus rei causa, nullius Philosophi schola intranda sit, idem testatur Apulej. *Apolog. p. m. 304*. Verbum illud excantare duplicem videtur habuisse significationem; primo de alieno in tuum traducere sic apud Virg. *Eclog. 8. vs. 99.*

*Atque satas alio vidi traducere messes.*

Ubi Servius Magicis quibusdam artibus hoc fiebat unde & in XII. *Tabb. neve alienam segetem pellegeris*, quod & Varro & multi Scriptores fieri deprehensum animadvertunt; ex istis verbis quidam aliam legem, ab ea de qua Seneca diversam, confingunt quod tamen necessarium non putat Gothof. in not. ad Leg. XII. *Tabb.* Secunda significatio verbi excantare videtur esse impedire ne fructus crescant aut maturescere possint hucque pertinent illa Ovid. *Amor. Lib. 3. eleg. 7. vs. 31.*

*Carminē læsa Ceres sterilem vaneſcit in herbam,*

*Deficiunt læſi carminē fontis aquæ,*

*Ilicibus glandes, cantataque vitibus uva,*

*Decidit, & nullo poma movente fluunt.*

Hæc omnia prohibita fuere XII. Tabulis; nec mirum rudem illam antiquitatem quæ bona fide credebatur ista sic facile peragi anxie circa fructus cavisse, quippe hiſce temporibus maximæ divitiæ in fructibus conſiſtebant. Qua vero pœna crimen illud vindicatum fuerit nobis non liquet. De Perſonis alia lege cautum fuiſſe hunc in modum, *Qui malum carmen incantaſſit aut malum venenum faxit dicitur Parricida eſto* colligi poteſt ex Plin. *Hiſt. Nat. Lib. 28. cap. 2. L. 236. D. de V. S.* & perſpicue ex Feſto *Litt. P. in fin.* ſi modo recte conjecit Scaliger qui locum ex quo tantum pauciſſima ſuperſunt ita reſtituit tribus xxxv. *aut privilegia irrogare, aut de capite civis ſtatuerē, niſi maximo comitiatu, vetant XII. Tabularum leges, præterquam veneficos, quique malum carmen incantant quia ipſi indēnati jure occiduntur*; egregia reſtitutio, quæque ſi legitima Feſti verba non repræſentat, ſaltem pulchre convenit cum paucis illis ſyllabis quæ ſuperſunt, ac recte quid in XII. *Tabb.* de hiſ incantatoribus cautum fuerit explicat.

De Chaldeis Mathematicis &c. in XII. *Tabb.* nihil cautum



fuit quod nobis cognitum sit, nec puto antiquis hisce temporibus multum de eis cogitatum fuisse, utpote rudibus adhuc Romanorum ingeniis nimisque bello deditis, quam ut artibus quarum abusus vanis istis superstitionibus originem dedit, operam impenderent. Postea artes hae simul cum Luxuria, Ambitione, Novandi cupiditate aliisque Reipublicae Romanae exitii causis in urbem se invexere, & varia ibi fata expertae sunt, sed eum in modum ut nihil verius sit quam elegans de Mathematicis dictum Taciti *Hist. Lib. 1. cap. 22. Genus hominum potentibus infidum, sperantibus fallax, quod in civitate nostra & vetabitur semper & retinebitur.*

§. II. Primum de Veneficiis iudicium habitum fuit A. U. C. 423. M. Claudio Marcello, C. Valerio Coss. quo patefactum est quamplurimas nobilissimas foeminas venenis urbem infestare, ac eo nomine ad centum & septuaginta damnatae sunt. Vid. Tit. Liv. *Hist. Lib. 8. cap. 18. Val. Max. Lib. 2. cap. 5. ex. 3.* Non videtur tamen crimen illud ad Magiam pertinuisse, potius referendum ad caput de Homine libero, per malum venenum occiso.

§. III. Anno U. C. 569, Sp. Posthumio Albino, Q. Marcio Philippo Coss. detectum fuit horrendum illud Bacchanalium arcanum. Sub praetextu nempe Baccho sacrum peragendi, conveniebant noctu vires & mulieres, nullaue scelera, nulla flagitia omittebant; totam rem late enarrat Liv. *Lib. 39. cap. 8. usque ad 20*, referam tantum ea ex quibus colligi potest haec quodammodo ad Magiam pertinuisse. *Si qui minus patientes dedecoris sint* ait Liv. *cap. 13. & pigriores ad facinus, pro victimis immolari: nihil nefas ducere hanc summam inter eos religionem esse. Viros velut mente capta, jactatione fanatica corporis vaticinari, matronas Baccharum habitu crinibus passis, cum ardentibus facibus decurrere ad Tiberim, demissasque in aquam faces (quia vivum sulphur cum calce insit) integra flamma efferre. Raptos a Diis homines dici quos machinae illigatos ex conspectu in abditos specus abripiant, eos esse qui aut conjurare aut stuprum pati noluerint.* Haec Livius quibus patet multa



in istis Orgiis peracta fuisse quae vulgo Magis aliisque similibus tribuuntur velut humanarum victimarum immolatio, jactatio corporis fanatica, Vaticinatio &c. Posthumius in oratione quam ipsi tribuit *Liv. ibid.* memorat jam olim saepe magistratibus negotium datum fuisse ut vaticinatores ex urbe ejicerent, libros conquirerent, comburerentque, quando vero hoc factum sit non addit, forte respexit Livius ad ea quae ipse retulit *Lib. 4. cap. 30.* ad A. U. C. 327. & *Lib. 25. cap. 1.* ad A. U. C. 539. quibus locis tale quid deprehendimus, de quo infra. Multi hujus nefandae conjurationis rei capite damnati sunt, factumque atrox de Bacchanalibus Senatusconsultum, quod etiamnum hodie integrum extat.

§. IV. Anno demum 614. edictum propositum fuit nominatim adversus Chaldeos, teste Val. Max. *Lib. 1. cap. 3. ex 2.* en ejus verba, *C. Cornelius Hispalus Praetor Peregrinus, M. Popilio Laenate, Cn. Calpurnio Coss. edito Chaldeos intra decimum diem abire ex Urbe & Italia jussit, levibus & inneptis ingeniis fallaci syderum interpretatione, quaestuosam mendacii suis caligiem injicientes.*

§. V. L. Cornelius Sylla Dictator, inter alias leges quibus Rempublicam & Jurisprudentiam auxit, anno 572. tulit celebrem illam Legem Corneliam *de Sicariis & Veneficiis*; Varia ejus fuere capita, passim collecta reperiuntur nec nobis otium est singula exponere. Caput quintum solum proprie ad nos pertinet in eo de Veneficis actum fuit teste Marciano in *L. 3 pr. D. ad Leg. Corn. de Sicar.* verba Legitima nobis exhibet Cicero *pro Cluent. cap. 54. Jube lex ea. . . . judicem quaestionis cum eis judicibus qui ei obvenerint . . . quaerere de veneno. In quem quaerere? infinitum est. Quicumque fecerit, emerit, vendiderit, habuerit dederit.* Ex his verbis patet lege nominatim cautum fuisse tantum de illis qui venenum malum proprie ita dictum adhibuerint, postea vero additis Senatusconsultis, ac Interpretatione prudentum, ad varia lex fuit extensa, praecipue ad crimen Magiae, inde Modestinus ait *L. 13. D. ad Leg. Cornel. de Sicar. Ex Senatusconsulto ejus legis poena damnari jubetur qui mala sacrificia fecerit habuerit*, quod proprie ad



ad Magiam pertinere videbimus ; inde etiam Paulus *Senten. Lib. 5. Tit. 23.* agit de Magis & similibus sub Titulo de Lege Cornelia. Peripicue autem Imperator Justinianus §. 5. *Inst. de Pub. Jud. Eadem lege (Cornelia) & venefici capite damnantur, qui artibus odiosis tam venenis quam susurris Magicis homines occiderint, vel mala medicamenta vendiderint.* Praetor ergo qui ex Lege Cornelia de Veneficiis cognoscebat proculdubio etiam de Magia quaerebat.

Poena Legis Corneliae proprie erat Aquae & Ignis interdictio, postea in ejus locum successit in Insulam deportatio, tempore vero Pandectarum humiliores ex vulgi faece Bestiis objiciebantur, honestiores qui nullo quidem honore conspicui nec tamen ex vulgi faece, capite puniuntur, qui vero in honore aliquo sunt positi veluti Principales in civitate ac Decuriones deportari solent, ut id more suo eleganter ostendit, vir omni laude major cujus verba retulit Antonius Schulting. *ad Paul. Sent. Lib. 5. Tit. 23. §. 1. not. 9.* In sequentibus videbimus hanc poenam ordinario fuisse usitatam.

§ VI Tempore quo C. Julius Caesar rebus potitus est, artem Mathematicam prohibitam fuisse non videtur. *Suet. in Vit. Augusti cap. 94.* referens prodigia quibus olim Augusto imperium promittebatur, ait, illum consulendi gratia Theogenis Mathematici pergulam comite Agrippa adscendisse. Pergulae autem erant loca in quibus publice artes liberales docebantur, ceu id recte ostendit Vir summus Claud. Salmas. *ad Vopisc. vit. Saturn. cap. 10.* (inter Historiae Augustae Scriptor. Tom. 2. p. 733. ed. in 8<sup>o</sup>.) si ergo Mathematici habuerint pergulas sequitur artem fuisse etiam publice comprobata. Cum vero Theogenis Augusto magna ac incredibilia praedixisset, quae postea eventu fuere confirmata, tantam fiduciam fati Augustus habuit ut Thema suum vulgaverit, nummumque argenteum nota Syderis Capricorni quo natus est percusserit, *Suet. l. c.* Bis tamen eo Imperante ex urbe fuere expulsi Mathematici, Anno 721. & 761. vid. *Dion. Cass. Lib. 49. & 56.*

§ VII. Tiberius per tempus quod apud Rhodum peregit, artem Mathematicam Magistro Tratullo didicit, postquam ejus



solertiam expertus esset eo modo quem refert Tacit. *Annal. Lib. 6. cap. 21.* huic arti admodum addictum fuisse testatur etiam Suet. *in Tiber. cap. 69.* Ipse tamen Tiberius Mathematicos ex Italia Senatusconsulto expulit, cujus rei occasionem diligenter narrat Tacit. *Annal. Lib. 2. cap. 27. & seqq.* idque etiam hic breviter referemus, tum quia hujus Senatuscon-  
 1  
 mentio fit in notabili fragmento Ulpiani apud Pariatorem *Legg. Mosaic. & Roman. Tit. 15. §. 2.* de quo postea, tum propter notanda haec Taciti verba *tum primum reperta sunt quæ per tot annos Rempublicam excēdere*, calumniae scilicet quibus infames Delatores, viros sanctos & quorum crimen unicum erat nullum flagitium commisisse, sub praetextu consultationis adversus Principem aut Rempublicam certae ac crudeli morti mancipabant, quod malum ad illud tempus ignotum, postea sub pessimis Principibus adeo excrevit, ut nil tam venerandum, nil tam sanctum, quod non sub insidiis istis nefandis corruerit.

Libo Drusus ex familia nobilissima Scriboniorum, erat juvenis facilis ac improvidus, Firmius Catus Senator ex intima ejus amicitia, eum impulit ut Chaldeos, Magos & somniorum interpretes confuleret, hortaturque ad magnum luxum nobilitatem suam ipsi ostentans, cum satis testium habere credidit, omnia ad Tiberium defert, is iram continens Libonem amice ut solebat accipit, ipsum Praetorem creat, donec Junius quidam, tentatus ut infernas umbras carminibus eliceret ad Fulcinium Trionem indicium detulit, is (ut erat ejus ingenium celebre inter accusatores) Consules adit, Senatus cognitionem poscit. Libo conatus Tiberium deprecari inanes preces effundit, multa ipsi crimina objiciuntur, inter caetera sua manu nominibus Caesaris aut Senatorum additas atroces vel occultas notas, negante reo, servi contra jus indigno artificio in caput Domini torquentur, militibus domus Libonis cingitur, miser ille tandem desperatione adactus mortem sibi conscivit, mox variae inventae adulationes quibus Tiberio placerent, factaque Senatusconsulta de Magis & Mathematicis Italia pellendis. Haec Tacitus ad annum 769, Ulpianus vero & Dion Cassius id referunt ad ann. 770.



Non tamen admodum acerbe illos habuit Tiberius ; *deprecantibus enim ac se artem desituros promittentibus , veniam dedit* Suet. *in Tib. c. 36.* Quippe metuebat tantum ne sub praetextu consultationis Mathematicae , aliquid contra ipsius imperium aut salutem moveri posset.

§ VIII. Sub Caligula prohibitam non fuisse artem Mathematicam forte colligere licet ex eo quod Suetonius refert *in ej. vit. cap. 57.* *Consulenti (Caligulae) de gentura sua Sylla Mathematicus certissimam necem appropinquare affirmavit.* Sub Claudio Anno U. C. 805. *De Mathematicis Italia pellendis factum Senatusconsultum atrox & irritum* , Tacit. *Annal. Lib. 12. cap. 52.* quid autem specialiter eo cautum , aut qua de causa irritum fuerit nobis non retulit Historicus.

§. IX. Neronem artibus Mathematicis Magisque , impense favisse nos docet Plin. *Hist. Nat. Lib. 30. cap. 2.* Imo cum post matris caedem furiis agigaretur facto per Magos sacro evocare manes & exorare tentavit teste Suet. *in Neron. cap. 34.* postea vero animum mutavit easque summo odio persecutus est. Hoc tempore tamen floruit celebris Mathematicus Seleucus de quo Suet. *in Oth. cap. 4.* Eodemque momento & ipse (Otho) *spem imperii cepit magnam quidem ex conditione temporum , sed aliquanto majorem ex affirmatione Seleuci Mathematici. Qui cum eum olim superstitem Neroni fore spopondisset , tunc ultro inopinatus advenerat imperaturum quoque brevi repromittens.* De eo etiam meminit Juvenal. *Sat. 6. §. 556,* ubi mulieres irridens quae nihil agunt nisi prius consulto Astrologo , inquit

*Præcipuus tamen est horum qui saepius exul,*

*Cujus amicitia conducendaque tabella*

*Magnus civis obit, & formidatus Othoni.*

Quibus verbis Seleucum indicat ex cujus praedictione Otho spem imperii ceperat , Galbamque occiderat. Ex istis etiam colligi potest , Seleucum illum fuisse exilio punitum , sub Nerone forte , propter praedictionem quam modo ex Suetonio adduximus.

§. X. Vitellius edictum proposuerat quo jubebat intra Ka-  
len-



*lendas Octobris Urbe Italiaque Mathematici excederent. Chaldaei contra, etiam specie edicti proposuere ne Vitellius Germanicus intra eundem Kalendarum diem usquam esset*, quod ipsi adeo stomachum movit ut quisque ex *vernaculis* & Mathematicis deferretur eum inauditum capite puniret. Haec Suet. in *Vitell. cap. 14.* locus ille multum exercuit viros doctos, quinam sint illi *vernaculi* non facile erat explicare, inde varie verbum illud emendarunt, legendo, *divinaculis*, *veraculis* &c. sed magna Reipublicae Litterariae decora Casaub. *ad Suet. l. c.* Gronov. *de Pecun. vet. Lib. 4. cap. 10.* Salmas. *ad Capitol. in vit. Macrin. cap. 13.* eruditissime ostenderunt nihil esse mutandum, & Suetonium per Vernaculos intelligere circulatores illos qui artem scurrilem exercent, Plebemque in foris ac triviis magnis promissionibus misere ludunt, quos (ut recte notat Salmas. l. c.) Galli vocant *Charlatans*.

§. XI. Sub Vespasiano meliora tempora vixisse videntur Mathematici, Tacitus saltem Hist. Lib. 2. cap. 78. refert Vespasianum ab illa superstitione vacuum non fuisse, *ut qui rerum dominus Seleucum quendam Mathematicum rectorem & praescium palam habuerit*, unde probabile videtur nullas adversus id genus hominum leges hoc tempore conditas fuisse. Filius Vespasiani Domitianus è contra acerbe illos habuit, quod colligo ex Sueton. in *Domit. Cap. 15.* ubi omina mortis Domitiani referens sic inquit, *Nulla tamen re perinde commotus est quam responso, casuque Ascletharionis Mathematici: Hunc delatum nec infitiantem jactasse se, quæ providisset ex arte, sciscitatus est, quis ipsum maneret exitus, & affirmantem fore ut brevi lacreretur a canibus, interfici quidem sine mora, sed ad coarguendam temeritatem artis, sepeliri quoque acuratissime imperavit &c.* Ad hæc verba notandum Ascletharionem delatum fuisse, quod procul dubio crimen indicat, ac confitentem interfectum fuisse, quod tanquam ordinarium refertur, jussum vero eum sepeliri tantum ad coarguendam temeritatem artis, e quibus haud difficulter eliciemus artem illam sub Domitiano fuisse crimen capitale.

§. XII. Quantum Hadrianus artibus Magicis ac Mathematicis



ticis fuerit deditus neminem fugit. Spartian. *in ej. vit. cap. 16.* *Matthesin sic scire sibi visus est ut sero Calendis Januariis scripserit quid eo toto anno posset evenire.* De Magia testantur ea quæ referunt Scriptores de morte Antinoi, quem adeo deperdite amabat ac muliebriter deflevit. Narrant enim Antinuum se devovisse ut Hadriani fata produceret, quod fieri posse dicebatur, modo aliquis non invitus pro eo mortem subiret, quod cum alii detrectarent Antinous se obtulit vid. Aurel. Vict. *in Cæsarib.* Dion Cassius vero affirmat Antinuum se devovisse non ut Hadriani vitam produceret, sed ut ex ejus visceribus Magi posset futura eruere, probabiliora tamen videntur quæ habet Aurelius, vix enim putarem Hadrianum voluptates suas sic crudeli morti dedere voluisse ad solam futuri indagationem Vid. Bayle *Dict. Hist. & Crit. Art. Antinous rem. B.*

§. XIII. Quid de Mathematicis aliisque cautum fuerit tempore Antonini Pii mihi non est compertum. Id unice notandum Apulejum sub eo & filio M. Aurelio vixisse, ac ut videtur Pio adhuc vivente, cum Magiæ accusaretur elegantem Apologiam quæ hodie superest, ad Claud. Maximum Proconsulem Africæ recitasse; id colligitur ex loco ipsius Apolog. *p. m. 327.* ubi Imperatorem Pium nominans non addit *Divum*, solitum defunctorum epitheton.

§. XIV. M. Antoninum Philosophum etiam inanibus hisce rebus fidem adhibuisse, volunt Historici. Lamprid. *in vit. Heliogab. cap. 9.* memorat tempore Heliogabali qui bellum Marcomannis inferre volebat dictum esse a quibusdam Marcum Antoninum id egisse, ut Marcomanni Populo Romano semper essent devoti ac amici, idque factis carminibus & consecratione Nescio an hic referam narrationem Capitolini *in vit. M. Ant. Philos. cap. 19.* nullam enim fidem mereri mihi videtur, refert, Faustina quondam Pii filiam Marci uxorem, quum gladiatores transire vidisset, unius ex his amore succensam, quum longa ægritudine laboraret, viro de amore confessam. Quod cum ad Chlædæos Marcus retulisset, illorum fuisse consilium ut occiso gladiatore sanguine illius sese Faustina sublavaret (Salm. cum MS. & antiq. edit. legit sublevaret idque interpretatur sanguinem



nem ebibere tanquam remedium) & sic cum viro concumberet. Egregia certe narratio: Faustina quæ (teste ipso Capitol. l. c.) apud Cajetam conditiones sibi & nauticas & gladiatorias eligebat, propter amorem ægritudinem contraheret, id viro fatetur, misero illo gladiatore occiso sanguine ejus potius quam ipsius opera uteretur, idque Antoninus omnium principum mitissimus permetteret; absit tam ridiculis fabulis fides. Adde quod ipse Capitolinus id non tanquam certum sed tantum ut vero simile adducit; sed hercle Scriptorem qui non melius judicio suo utitur non magni facere possum.

Quidquid hac de re sit, nulla quod sciam Antonini Philosophi de Magis aut Mathematicis extat constitutio. Nec de ejus filio Commodò quicquam notandum occurrit nisi quod sub ejus Imperio, Severus qui postea Imperium adeptus est, in Sicilia reus factus apud Praefectos Praetorio, quibus audiendus datus fuerat, jam Commodò in odium veniente absolutus est, calumniatore in crucem actò. Vid. Spartian. in vit. Sever. cap. 4. De Didio Juliano qui regnum tantum per duos menses tenuit notat idem Spart. in ej. vit. cap. 7. illum Magiae admodum fuisse addictum, ita ut per Magos pleraque faceret quibus putaret vel odium populi deliniri, vel arma militum compeisci.

§. XV. Pervenimus ad Antoninum Caracallam, sub quo Paulus ac Ulpianus vixere. Herodian. Lib. 4. cap. 23. testatur eum fuisse curiosum omnium artium Magicarum, ita ut omnes Magos, Astrologos &c. conquissiverit ut de fine vitae suae eos consuleret, quod sane quis mirari posset, cum ex Pauli & Ulpiani fragmentis, de quibus mox, pateat, severissimis legibus has artes prohibitas fuisse. Sed novum non est Principes ipsos exercere quae in aliis acerbe puniunt, quodque praesertim in hoc crimine locum habere potest, cum fere nihil in eo vindicarent plerique Principes praeter metum ne sub praetextu consultationis aliquid contra ipsorum Majestatem aut vitam committeretur. Caeterum extat Rescriptum Imp. Antonini in l. 1. Cod. de Malef. & Math. in haec verba: Plus est hominem extinguere veneno quam occidere gladio. Videtur ea referenda ad Antoninum Caracallam, cum nomine Antonini nul-

lo addito cognomine vulgo in Codice designetur, ut observavit Illustr. Spanheim *Orb. Rom. Exercit. 2. cap. 4.* Verum cum non adsit dies nec Consul, nec forte rescriptum sit integrum, qua occasione editum fuerit definiri nequit. Haec de fatiis Artium Magicarum & Mathematicarum usque ad tempora Pauli ac Ulpiani. Pergamus jam ad, ea quae nobis in hanc rem ex eorum scriptis supersunt & videamus num quid ad illorum illustrationem adferre possimus.

## CAPUT TERTIUM.

*De Fragmentis Pauli in Sent. Lib. V. Tit. XXIII. & Ulpiani in Collat. Legg. Mosaic. & Rom. Tit. XV.*

### §. I.

Multa hic de Paulo ejusque vita differere foret aequè inutile ac taediosum, cum quae de eo dici possunt sexcenties sint a viris doctis exposita & cuique cognita. Magnus hicce Jurisconsultus in Sententiarum *Lib. 5. Tit. 23.* agens de Lege Cornelia de Sicariis & Veneficis, aliquid etiam de Magis dixit, quae nobis ab Aniano servata sunt; de istis nunc videamus, quae vero in *Tit. 21. De Vaticinatoribus ac Mathematicis* habet cum illis quae apud Ulpianum inveniuntur jungemus. Quod primum occurrit extat in §. 14. *Quia abortionis aut amatorium poculum dant et si dolo non faciant, tamen quia mali exempli res est, humiliores in metallum, honestiores in insulam amissa parte bonorum relegantur. Quod si ex hoc homo aut mulier perierit summo supplicio adficiuntur.* Haec etiam inveniuntur in *l. 28. §. 5. D. de Poen.* ibique pro *si ex hoc homo aut mulier &c.* legitur *si ex hoc mulier aut homo &c.* quod melius cum ordine



ordine orationis convenit ut notat Cl. Schulzing. *ad b. l.*

Crimen abortionis olim Romae erat frequentissimum, omnibus bonis quidem damnatum, at nullis legibus coërcitum ante rescriptum Divi Severi & Antonini, quod refert Marcianus in *l. 4. D. de extraord. crim.* & ad quod respicit Tryphoninus in *l. 39. D. de Poen.* Vid. virum summum Gerard. Noodt *Jul. Paul. cap. ult.* ubi id eleganter probavit. Sed haec proprie ad Magiam non pertinent, magis huc facit quod sequitur de amatorio poculo. Putabant nempe veteres, potionibus quibusdam animos posse deliniri, ac ad amandum adduci, *Philtre* haec vocabant; hujus rei meminit Horat. *Epod. 5. vs. 37.* ubi horrendas Canidiae artes describens, ait illam puerum defossū inedia necare

*Exesa uti medulla & aridum jecur  
Amoris esset poculum.*

Iterumque *vs. 73.*

*Non usitatis, Vare, potionibus  
(O multa fleturum caput)  
Ad me recurre: nec vocata mens tua  
Marsis redibit vocibus:  
Majus parabo: majus infundam tibi  
Fastidienti poculum.  
Priusque coelum fidet inferius mari,  
Tellure porrecta super,  
Quam non amore sic mei flagres, uti  
Bitumen atris ignibus.*

Verum (quanta vis Magiae) non tantum potionibus, sed etiam sola vi carminum mens ad omnia poterat deflecti. Loca quibus hoc asseritur congerere infinitum foret, solum Virgilii testimonium sufficiet, in *Eclog. 8. vs. 64.*

*Effer aquam & molli cinge hae altaria vitta,  
Verbenasque adole pingues, & mascula Thura.  
Conjugis ut Magicis sanos avertere sacris  
Experiar sensus: nihil hic nisi carmina desunt.*

Vide & quae sequuntur ad finem usque, quibus magnus ille artifex Magicum sacrum descripsit, docte, eleganter, sobrie,  
ac

ac apposite, ut nihil sit supra. At si quis Poëtarum testimonia contempserit credat saltem Plinio *Hist. Nat. Lib. 25. cap. 3.* & Plutarcho. *in Lucullo in fin.* qui narrant Lucullo amatorium poculum datum, illumque ex eo periisse, credat Amm. Marcellino *Lib. 28. p. m. 359.* ubi crudelitates Maximini Praefectus Annonae referens, ait, *mors Marini causarum defensoris eminus: quem ut ausum Hispanillae cujusdam, artibus pravis adfectasse conjugium, transeunter indiciorum fide discussa, supplicio lethali damnavit,* similemque casum refert *p. 364.* quibus in locis, per pravas ac nefarias artes, intelligendas esse artes Magicas, docet Gothof. *ad l. 3. Cod. Theod. de Malef. & Mathem.* Haec erat veterum communis sententia, quanto melius magnis artis amatoriae magister, in hisce versiculis, adeo lepidis, ut quin eos referam temperare mihi non possim

*Fallitur, Haemonias si quis decurrit ad artes,*

*Datque quod a teneri fronte revellet equi.*

*Non facient, ut vivat amor, Medeides herbae,*

*Mixtaque cum Magicis, naenia Marsa sonis,*

*Phasias Aesoniden, Circe tenuisset Ulixen,*

*Si modo servari carmine possit amor,*

*Nec data profuerint pallentia Philtra puellis,*

*Philtra nocent animis vimque furoris habent.*

*Sit procul omne nefas ut ameris amabilis esto.*

Haec recte Ovid. *Art. Am. Lib. 2. v. 99.* Sed de hisce jam plus fatis; iterum a Poëtis ad Jurisconsultos redeamus.

Lege Cornelia tantum tenetur, is qui hominis occidendi gratia, malum venenum dederit *l. 3. §. 2. D. ad Leg. Corn. de Sic.* ubi Jurisconsultus varias vocis veneni significationes enarrans *Ergo inquit nomen medium est, & tam id quod ad sanandum, quam id quod ad occidendum paratum est, continet, sed & id quod amatorium appellatur. Sed hoc solum notatur in ea lege, quod hominis necandi causa habet.* quibus addenda regula contenta in *L. 7. eod.* *Nec in hac lege culpa lata pro dolo accipitur.* Ex istis facile est rationem reddere, quare qui Poculum abortionis aut amatorium dederit, in legem Corneliam non incidit; Poculum nempe abortivum non datur hominis necandi gratia, notum enim



enim est, foetum dum est, in visceribus matris, veteribus hominem non esse *L. 9. §. 1. D. ad Leg. Falcid.* sed tantum partem viscerum mulieris *L. 1. §. 1. D. Ventr. inspic.* In eo autem qui Philtrum dat, etsi culpa sit, dolus tamen abest, itaque nec ille in legem incidit. Sapienter tamen censuerunt Jurisconsulti, haec, cum sint pessimi exempli non debere impunita remanere, quam magnum enim crimen sit, mulieri abortum procurare, quamvis ex principiis Juris Civilis deduci nequit, illos tamen qui ratione sana utuntur fugere non potest, ac quantum periculi in se habeat alicui amatorium praebere, exempla passim, & illustre illud Luculli quod jam retulimus, facile probant. Non immerito ergo humiliores metallis, honestiores relegatione amissa parte bonorum puniuntur; si autem alicui mors praebita sit, summo supplicio adficiuntur. Non tradit Paulus unde hoc jus productum sit. Quod ad abortionem, jam monuimus id a Severo & Antonino rescriptum fuisse, forte eodem rescripto etiam de Poculo amatorio cautum fuit. Ceterum nullum est dubium quin hoc pertineat ad alia similia, veluti *odii potionem*, de qua vid. prolixas Quintiliani *Declam. 14. & 15.* Haec de Philtris.

§. II. *Qui sacra impia nocturnave, ut quem obcantarent, defigerent, obligarent, fecerint faciendave curaverint, aut cruci suffiguntur aut bestiis objiciuntur.* haec sunt verba Pauli in §. 15. *h. t.* Sacra impia ac nocturna hic sunt sacra Magica, quae noctu solent peragi, ut ex infinitis Poëtarum locis notum est vid. *Celeb. Broekhus. ad Propert. Lib. 2. el. 1. v. 3.*

Ait Paulus *ut quem obcantarent*, quod pertinet ad illud *Incantassit XII. Tabb.* de quo supra, si quis nimirum malum carmen adversus aliquem condiderit, ut eum morte aut alio quovis malo afficiat, etiamsi res effectu caruerit, quod aliter putat *Merill. Obs. Lib. 8. cap. 4.*

*Defigerent* verbum Magis proprium quando artes suas adhibent ad impediendum ne quis aliquid agere possit, praesertim ne quis Veneris opus perficere queat vid. *Tibul. Lib. 1. el. 6. v. 5. ibiq. Broekh.* Varie id fiebat aut enim nomina tabellis inscribebant & imprecationibus devovebant, aut Imagines ce-



reas faciebant, ad similitudinem eorum quos defigere volebant, illasque acu transfodiebant. Ovid *Amor. Lib. 3. el. 7. v. 27.*

*Num mea Thessalico languent devota veneno.*

*Corpora? num misero carmen & herba nocent.*

*Sagave poenicea defixit nomina cera,*

*Et medium tenues in jecur egit acus.*

Confer quae ad haec verba habet egregius *Poëtarum sospitator* Heinsius, de verbo *defigere* prolixissime egit Salmas. *ad Solin. p. 1088.*

*Obligarent.* Obligare est animam in laqueis amorum ac voluptatum irretitam retinere, quod apud Poëtas per vincire exprimitur. Vid. Broekh. *ad Tibul. Lib. 1. el. 2. v. 60.* ut & Lindenbrög. *in Gloss. cod. Legg. Ant. voce Ligatura.* Sacra nocturna jam olim erant prohibita, sed alio sensu, nempe ne quid contra Rempublicam molirentur homines inquieti; at postea ex Senatusconsulto, Legis Corneliae poena damnari jubetur *qui mala sacrificia fecerit habuerit L. 13. D. ad Leg. Cornel. de Sic.* Tempore Pauli vero poena propria Legis Corneliae jam abolita, qui haec faciunt aut cruci suffiguntur, aut bestiis objiciuntur, quod tamen ad humiliores modo pertinere videtur, ut notat Celeb. Schulting. *ad b. l.* quod etiam patet si conferatur §. 1. *ejusd. tit.* ubi Paulus inquit omnia facinora illic enumerata, quibus & veneficium continetur, in honestiores capite, in humiliores cruce aut bestiis puniri.

§. III. Sequitur apud Paulum §. 16. *Qui hominem immolaverint, exve ejus sanguine litaverint, Phanum Templumve polluerint bestiis objiciuntur, vel si honestiores sint capite puniuntur.* Hac superstitione, adeo immani ut vix credibile sit homines tantas crudelitates excogitare potuisse, nulla forte est antiquior. Usitata fuit Religionis causa, apud multos populos, qui putabant Deorum iras facilius placari, si homines pretiosae victimae, immo saepe proprii filii immolarentur.

*Tantum Religio potuit suadere malorum.*

Religio nempe prava ac superstitiosa; sed de Piis istis crudelitatibus non est hic locus agendi, de iis quaedam erudita habet Celeb. Schulting. *ad b. l.* & consuli possunt Auctores ab ipso



ipso laudati. Apud plerosque tamen populos haec sacra summo jure erant nefaria ac detestata, nec usitata nisi illis qui Magiae erant mancipati, qui praecipue haec agebant ad animas ex inferis evocandas. Ut Poëtas omittam id testatur Cicero in *Vatin. cap. 6.* ubi sic in eum invehitur *quae te tanta pravitas mentis tenuerit, qui tantus furor ut cum inaudita ac nefaria sacra susceperis, cum inferorum animas elicere, cum puerorum extis Deos manes mactare soleas; auspicia quibus haec urbs condita est, quibus omnis Respublica atque Imperium tenetur, contemseris,* hic & obiter notari potest significatio verbi *mactare* pro *placare* de qua vid. Muret. ad *Cicer. in Catil. orat. 1. cap. 11.*

Paulus hic non distinguit quo animo quis talia sacra peragat, an Religionis, aut Magiae causa, sed in genere, monet omnes qui hominem immolaverint poenae legis Corneliae subijci.

§. III. *Magiae artis conscios summo supplicio adfici placuit, id est bestiis objici aut cruci suffigi. Ipsi autem Magi vivi exuruntur,* sic Paulus in §. 17. *b. t.* At ut verum fatear haec mihi non sunt perspicua, age enim, conferamus quae jam habuimus. Egit Jurisconsultus de illis qui Philtra praebent, de illis qui homines incantant, defigunt, obligant, de illis qui homines immolant, omnesque quod ad poenam pari passu ambulare docuit, hic vero ait Magos vivos exuri, quod supplicium caeteris gravius existimatur, ut id probat Cel. Schulting. ad *Paul. Sent. Lib. 5. Tit. 17. §. 3.* ac eorum conscii aliis istis facinorosis adaequantur, debent ergo Magi de quibus hic agitur multo atrocius quam alii peccare, quod tamen admodum difficile videtur, quid enim magis nefandum quam homines pro victimis immolare & ex eorum sanguine litare. De quibus ergo Paulus hic agit? Miror viros doctos de eo nihil ad *b. l.* dixisse. Mihi videtur Jurisconsultus, agere de iis qui vi carminum ac impiis sacris animas ex inferis eliciunt, placidosque defunctorum manes turbare non verentur, quod ultimus Magicae artis terminus, scelusque caeteris multo atrocius, habebatur, & semper Romanis abominandum vid. Bröekh. ad *Tibul. Lib. 2. el. 2. v. 45.* non



mirum ergo si ipsis Jurisconsultus Magorum nomen κατέχο-  
 χην tribuat, graviolemque pœnam minetur. Si hæc non ita  
 se habeant fateor me non videre quid intersit inter Magos de  
 quibus in §. 17. & alios de quibus in præcedentibus actum,  
 aut quæ sit ratio pœnarum diversitatis. Quidquid sit, non  
 tantum autores sed etiam conscii puniuntur, conscii autem non  
 sunt qui sciunt hæc ab aliquo exerceri, sed qui quovis modo  
 participes sunt quod recte hic post Brisson. & Gothofredum  
 notavit Cel. Schulting. Nec hic omittendum non modo pro-  
 fessionem hujus artis, sed & scientiam esse prohibitam, libros-  
 que circa eam conscriptos, comburendos, quod testatur Pau-  
 lus in §. 18. *b. t.* at de eo plura videbimus infra.

§. IV. Hæc de Pauli fragmentis, accedamus jam ad ea quæ  
 ex Ulpiano nobis servavit Pariator *Legum Mosaicarum ac  
 Romanarum Tit. 15. §. 2.* ubi exhibet fragmentum notabile, sed  
 non minus corruptum quam cætera fere omnia quæ in exiguo  
 hoc libello continentur, nullum enim antiquitatis monumen-  
 tum, incuria librariorum, aut vi edacis vetustatis pejus habitum  
 fuit, ita ut sæpe impossibile sit sensum eruere, frustra que la-  
 borarint viri docti de ejus laciniis restituendis. Fragmentum  
 integrum, etsi aliquanto longius, hic apponam, prout extat in e-  
 ruditissima illa *Jurisprudentia Ante Justiniana* Cel. Schultin-  
 gii p. 785.

*Ulpianus Libro 7. de officio Proconsulis; sub titulo de Mathe-  
 maticis & Vaticinatoribus. Præterea interdicta est Mathemati-  
 corum callida impostura, & obstinacitate persuasio. Nec hodie  
 primum interdici placuit: sed vetus hæc prohibitio est. Denique  
 extat Senatusconsultum Pomponio & Rufo Coss. factum, quo  
 cavetur, ut Mathematicis, Chaldæis, Ariolis, & cæteris qui  
 similem incertum fecerunt aqua & igni interdicatur: omniaque  
 bona eorum publicentur, & sic æternus gentium qui si id fecerit  
 ut in eum animadvertatur. Sed fuit quæsitum utrum scientia  
 hujusmodi hominum puniatur an exercitio & professio. Et qui-  
 dem apud veteres dicebatur, professionem eorum non notitiam es-  
 se prohibitam. Postea variatum: nam dissimulandum est non-  
 nunquam inrepsisse in usum, ut etiam profiterentur, & publice*



reprehenderent. Quod quidem magis per contumaciam & temeritatem eorum factum est qui visi erant vel consulere vel exercere, quam qui fuerant permissum. Sæpiissime denique interdictum est ne quis huiusmodi ineptiis se immisceret: & varie puniti sunt hi qui id excercuerunt pro, mensura scilicet & consultationis. Nam qui de Principis salute, capite puniti sunt, vel qua alia graviore pœna adfecti. Enimvero si quidem suorumque levius, inter hos habentur quam vaticinatores, hii quoque plectendi sunt: quoniam nonnunquam contra publicam quietem, imperiumque Populi Romani improbandas artes excercunt. Extat denique decretum Divi Pii ad pacatum legatum Provinciæ Lugdunensis, cujus rescripti verba, quia multa sunt de fine ejus ad locum hæc pauca subjecit. Denique Divus Marcus, eum qui motu Cassiano vaticinatus erat, & multa quasi extinctu Deorum dixerat, in insulam Syrum relegavit, & sane non debent impune ferre huiusmodi homines, qui sub obtentu & monitu Deorum quædam vel renuntiant vel jactant, vel scientes eos fingunt.

Ulpianus Libro 7. de officio Proconsulis. In Provinciis omnis jurisdictio, omnis criminum cognitio, erat penes Proconsulem L. 7. §. 2. D. de Off. Procons. quæ est ex eodem Ulpiani opere. Non mirum ergo, de officiis hujus Magistratus agentem etiam de variis criminibus egisse. Id specialiter fecit Ulpianus in Libro 7. ceu patet ex inscriptionibus plurimarum legum ut L. 1. D. ad Leg. Jul. Majest. L. 6. D. de vi Publica &c. vid. Cel. Schulting. dissert. pro rescript. Imperat. §. 5. ubi etiam refutat sententiam eorum, qui ex loco Lactantii Inst. Div. Lib. 5. cap. 11. vitiose edito, putant Ulpianum septem integros hujus operis libros impendisse, in colligendis Imperatorum adversus Christianos rescriptis, qui id fecit tantum in libro illo septimo, in quo de criminibus ipsi sermo erat.

Sub titulo de Mathematicis & Vaticinatoribus. Jurisconsultorum morem jam olim fuisse, libros in varios titulos distinguere, plus notum est quam ut monere necesse sit Vid. Schulting. ad Inscrip. Sent. Pauli. Mathematici qui ut Gellius notat Noct. Attic. Lib. 1. cap. 9. gentilitio vocabulo Chaldæi dici deberent, sunt qui ex Syderum motu futura erui posse contendunt Cicero de Divin. Lib. 1. cap. Chaldæi non ex artis sed



*ex gentis vocabulo nominati, diuturna observatione Syderum, scientiam putantur effecisse, ut prædici posset quid cuique eventurum, & quo quisque fato natus esset. Hi etiam Astrologi vocantur, Juvenal. Sat. 6. v. 552.*

*Chaldæis major erit fiducia; quidquid  
Dixerit Astrologus, credent a fonte relatum  
Hammonis.*

Hic vero per Mathematicos, intelligi possunt omnes qui quocunque modo, præter Magiam, futura prædicunt, ut jam observavimus in initio hujus Dissertationis. Vaticinatores nobis definit Paulus Sentent. Lib. 5. Tit. 21. ubi & ille quædam de Mathematicis & vaticinatoribus habet. Vaticinatores inquit qui se Deo plenos adsimulant.

*Præterea interdicta est Mathematicorum callida impostura & obstinacitate persuasio.* Verbum *præterea*, facile indicat hæc esse excerpta, ex loco quo Ulpianus de aliis ejusdem generis nebulonibus egerat, verum de quibus non liquet, forte de Magis. Scribit hic Ulpianus artem Mathematicam esse prohibitam, Lampridius autem *in vit. Alexandri Severi cap. 27.* (sub quo etiam Ulpianus vixit) testatur Mathematicos publice ejus jussu docuisse. Ne quis ergo putet hæc contraria esse, notandum est, libros de Officio Proconsulis jam sub Caracalla conscriptos fuisse, ut patet ex *l. 4. pr. L. 6. §. 3. D. de Off. Procons. L. 6. D. de Legation.* & aliis ex his libris desumptis quibus mentio fit Caracallæ tanquam adhuc viventis.

*Obstinacitate persuasio*, quid sibi volunt hæc verba? procul dubio sunt corrupta, at quomodo restituenda? quidam ediderunt *obstinata persuasio* sensu plano, nihil tamen mutare voluit Cel. Schulting. *ad b. l. A. Praeses a Bynkershoek Obser. Lib. 6. cap. 5.* reponit *obstinacitatis persuasio*, ob prædictiones nempe quibus animos obdurant, ut ipse loquitur. De eo quod additur veterem hanc esse prohibitionem hic nihil notabimus, id enim jam supra *in cap. 2.* ostendimus, ac de illo Senatusconsulto, Pomponio & Rufo Coss. condito, quædam *in §. 7. d. cap.* diximus. Quid vero eo cautum fuerit Tacitus omisit, at hic ex Ulpiano docemur.



Cavetur ut Mathematicis, Chaldaeis, Ariolis & ceteris qui similem incertum fecerunt aqua & igni interdicatur, omniaque bona eorum publicentur, & sic aeternus gentium, qui si id fecerit ut in eum animadvertatur. Ariolos definit Isidor. Origin. Lib. 8. cap. 9. Arioli ita vocati, quod circa aras idolorum nefarias preces emittunt, & funesta sacrificia offerunt, iisque celebritatibus Daemonum responsa accipiunt, elegantius Tertullian. Apolog. cap. 23. qui Aris inbalantes numen de nidore concipiunt. Quam mutilus sit hic locus non opus est monere, varie de eo laborarunt viri docti. Pithoeus conjicit pro similem incertum, similem artem, Jac. Gothofr. ad L. 7. Cod. Theod. de Pagan. (in notis) legit incertorum artem, vel incerti quaestum. Lipsius ad Tacit. Ann. Lib. 2. cap. 32. excur. G reponit similem quaestum. Omnes tamen hae conjecturae magis videntur exhibere quid Ulpianus voluerit quam quid scriptum fuerit, multum enim a vulgata lectione abeunt, magis huic accedit lectio Forsteri Observat. Succisiv. Lib. 1. cap. 18. (in Thes. Jur. Tom. 2.) Legit similem incestum, idque confirmat ex Virg. Aen. Lib. 6. v. 149. ubi de Miseno submerso ac insepulto relicto,

Praeterea jacet exanimum tibi corpus amici,

(Heu nescis) totamque incestat funere classem.

ibique Servius Incestat. Polluit, & incestus est quaecunque pollutio, sic & Horat. Lib. 3. od. 3. v. 19. dixit Incestus iudex pro iudice scelerato ac corrupto. Quomodo tamen ab Ulpiano scriptum fuerit pro certo affirmari non potest.

Non minus medica manu egent sequentia. Et sic aeternus gentium qui si id fecerit ut in eum animadvertatur, ex quibus sic conceptis, vel ipse Oedipus se extricare non posset, Cel Schulting. ad h. l. putat plura intercidisse, quod forte verum est, putarem tamen posse & aliter rem salvam esse, locumque valde corruptum non magno negotio restitui, si nempe adhibita correctione Schultingiana pro aeternus, externarum, legatur Et si externarum gentium quis id fecerit, ut in eum animadvertatur, tum sensus erit planus, ac ut mihi videtur omnia bene cohaerebunt. Nempe cavetur ut Mathematicis, Chal-



Chaldaeis, & ceteris qui similem *incestum* fecerint, aqua & igni interdicatur, at cum haec sit poena propria Romanorum, nec ad peregrinos extendi possit, ulterius cautum est ut *si quis externarum gentium* id fecerit, in eum animadvertatur; id est ut is capite puniatur, ceu probat Cel. Schult. *ad Paul. Sent. Lib. 1. Tit. ult. §. ult.* Forte scriptum fuerat *si extern. gent.* unde facile effici potuit *aetern. gent.* ac quam facillime ex *quis* id factum est *qui si id.* Sic mihi videtur de loco non admodum facili, iudicium eruditioribus relinquo.

Ex istis videmus etiam adversus Mathematicos aliosque similes adhibitam fuisse poenam Legis Corneliae, sed Peregrini severius puniuntur: quod Romanis usitatum docte suo more probat Illustr. Spanhem. *Orb. Rom. Excer. 2. cap. 24.*

Quaerit jam Ulpianus an tantum hujus artis professio, an etiam notitia puniatur. Apud veteres professionem modo prohibitam fuisse, nos docet, *Postea tamen variatum nam dissimulandum est nonnunquam inrepsisse in usum ut etiam profiterentur & publice reprehenderent.* Sensus hic omnino exigit ut legatur vel *dissimulandum non est* vel *nec dissimulandum est*, & pro *reprehenderent* cum summis Viris Pithoeo & Schultingio legendum *responderent*, verbum Mathematicis proprium ut notat hic laudatus Schulting. *Quod quidem magis per contumaciam eorum factum est qui visi erant vel exercere vel consulere quam qui fuerant permissum.* Pithoeus recte pro *visi erant* reponit *ausi erant*, nisi quis malit *visi* retinere idque cum Salmasio *ad Capitol. in vit. Ver. cap. 9.* accipere pro qui *consulebant* aut *exercebant*. Iterumque cum Salmas. *ad Lamprid. Alexand. Sever. cap. 27.* *quam qui fuerit permissum*, aut quod malle *quam quia fuerat permissum*, quomodo ut quis legat per se licere testatur Cel. Schulting. Hae veterum variationes, de quibus hic Ulpianus, a nobis supra pro viribus sunt expositae. Quid circa hanc rem suo tempore obtinuerit non docet Jurisconsultus, at ex ipsius aequali, Paulo *Sent. Lib. 5. Tit. 21. §. ult.* colligere possumus, scientiam a professione separatam, non omnino fuisse prohibitam. *Non tantum, inquit, Divinatione quis sed ipsa scientia melius fecerit abstinere*, quibus verbis potius videtur confi-



consilium dare quam jus tradere. Sed hoc unice ad Mathematicos pertinet, Magi enim multo durius tractantur. Eorum scientia adeo prohibita est, ut nequidem ejus libros habere liceat. *Paul. Sent. Lib. 5. Tit. 23. §. 18. Libros Magicae artis apud se habere neminem licet, & si penes quoscunque reperti sint, bonis adeptis ambustisque his publice, in Insulam deportantur, humiliores capite puniuntur. Non tantum hujus artis professio sed etiam scientia prohibita est. Idem de libris testatur in L. 4. §. 1. D. fam. ercisc. Mala medicamenta & venena, veniunt quidem in judicium, sed judex omnino interponere se in his non debet. Boni enim & innocentis officio eum fungi oportet. Tantundem debet facere in libris improbatæ lectionis, Magicis forte vel his similibus, haec enim omnia protinus corrumpenda sunt.*

Videmus hic libros improbatæ lectionis aequè ac mala venena esse corrumpendos, (non enim necesse est ut pro corrumpenda legatur comburenda Vid. Cel. Schulting. ad *Paul. l. c.*) Libri autem improbatæ lectionis dicuntur esse, Magici aut *his similes* quod Cel. Noodt in *comment. ad Tit. D. fam. ercisc. p. 240.* explicat de libris Christianae Religionis, idque colligit ex *Lactant. Instit. Divin. Lib. 5. cap. 11. & Prudent. Peristeph. Hymn. 2. vs. 181. & seqq.* Quando primum poena ignis in libros sit introducta, loco eleganti nos docet M Annaeus Seneca *Controv. Lib. 5. in Prooem.* ubi agit de Tito Labieno celeberrimo oratore qui sub Augusto floruit. *In hunc primum* inquit Seneca, *excogitata est nova poena, effectum est enim per inimicos ut omnes ejus libri incenderentur. Res nova & insuetæ, supplicia de studiis sumi & paulo post, Facem studiis subdere & in monumenta disciplinarum animadvertere, quanta & quam non contenta certa materia, saevitia est. Dii melius quod eo seculo ista ingeniorum supplicia coeperunt, quo & ingenia desierunt.* Vere ac magno rei litterariae bono haec philosophatus est Seneca, quod autem notabile est, *ejus qui hanc in scripta Labieni Sententiam dixerat, postea viventis adhuc scripta combusta sunt, jam non malo exemplo quia suo.* haec Seneca l. c. ubi plura de illo Labieno, quibus adde Vossium *de Hist. Latin. Lib. 1. cap. 23.* Sed haec in transitu revertamur ad Ulpianum.



*Saepeffime denique interdictum est fere ab omnibus Principibus ne quis hujusmodi ineptiis se immisceret.* Ineptias has artes vocat Ulpianus, ex sententia nimirum sapientissimorum fere omnium inter veteres, qui quotiescunque de rebus istis serio agunt eas inter inania ac ridicula rejiciunt. Neque tantum de Chaldaeis sed etiam de Auguribus aliisque religionis ministris sic sentiebant, adeo ut Cato non vereretur dicere se mirari quod non rideret haruspex haruspicem cum vidisset, teste Cicerone in *Libro 2. de Divinatione*. Longa ac operosa oratione refutatur haec ars Mathematica apud Gell. *Noct. Attic. Lib. 14. cap. 1.* Non minus solide, ac mea sententia multo elegantius, has partes etiam sustinuit Philosophorum eloquentissimus M. Tullius, per totum fere librum secundum de *Divinatione*. Non omnes tamen qui hisce operam impendunt, iisdem poenis afficiuntur sed *pro mensura scilicet & consultationis*, pro quibus verbis legendum cum Gothof. ad *L. 6. Cod. Theod. de Malef. & Math. pro mensura scilicet consultationis* deleta particula &, aut cum Pithoco ad *b. 1. & Lips. ad Tacit. Ann. Lib. 2. cap. 32. exc. G. pro mensura sceleris & consultationis* errore orto ex siglis *sc. vel scel.*

*Nam qui de Principis salute capite puniuntur.* Idem & Paulus *Sent Lib. 5. Tit. 21. §. 3.* testatur. *Qui de salute Principis, vel de summa Reipublicae* (aut cum Giphanis de *summa Republica*) *Mathematicos, aruspices, vaticinatores consulit cum eo qui responderit capite punitur.* De salute Principum aut rebus ad eos pertinentibus, ac de fortuna Reipublicae consulere semper fuit crimen capitale. Sic sub Tiberio, Lepida nobilissima matrona plurimorum criminum rea, etiam accusabatur per Chaldaeos in Domum Caesaris quaesivisse, fuitque aqua & igni interdicta Tacit. *Ann. Lib. 3. cap. 22.* ut omittam mortem Libonis Drusi de qua jam supra. Sub Claudio, Agrippina Lolliae molitur crimina & accusatorem qui objiceret Chaldaeos, Magos, interrogatumque Apollinis Clarii simulacrum super nuptiis Imperatoris: fuitque ad mortem adacta. Tacit. *Ann. Lib. 12. cap. 52.* Cum Nero virtutem ipsam exscindere vellet morte Bareae Sorani & Thraseae Peti, Sorano objectum fuit filiam



liam suam Magos de Caesare consuluisse, Tacit. *Ann. Lib. 16. cap. 30.* quid multa? id semper ita se habuisse facile patet, ac per totam seriem Imperatorum exequi longum foret, Severum ipsum qui postea imperium adeptus est de hoc crimine reum factum fuisse jam vidimus. Hujus prohibitionis rationem elegantem nec injustam refert Tertullian. *Apolog. cap. 35. in fin.* Cui autem opus est perscrutari super Caesaris salute, nisi a quo aliquid adversus illam cogitatur vel optatur, aut post illam speratur & sustinetur, ad quem locum vid. Desid. Herald. qui & notabilem locum Julii Firmici adducit. Proxime ad consultationem de salute Principis, accedit consultatio servi de salute Domini, idque ex eadem ratione uti observavit Cel. Schulting. *ad Paul. Sent. Lib. 5. Tit. 21. §. ult.* ubi sic Paulus: *Servi autem si de salute Dominorum consuluerint summo supplicio id est Cruce adficiuntur; Consulti autem si responsa dederint aut in metallum damnantur, aut in Insulam deportantur.* Rationem nobis praebebit Tertullianus, verbis ea quae jam attulimus proxime sequentibus, *Non enim ea mente de Charis consultitur qua de Dominis. Aliter curiosa est sollicitudo sanguinis, aliter servitutis.* Servi autem consulentes, cum nulla inter eos sit status differentia, indistincte cruce afficiuntur, quod vulgare servorum supplicium esse neminem fugit, at in consultoribus videtur iterum Jurisconsultus, distinctionem inter humiliores & honestiores admittere, ut illi nempe in metallum damnentur, hi vero in Insulam deportentur.

Pergit Ulpianus *Enimvero siquidem suorumque levius, inter hos habentur quam Vaticinatores, hi quoque plectendi sunt quoniam nonnunquam contra publicam quietem imperiumque Populi Romani improbandas artes exercent,* hic iterum agnoscimus sacrilegas librariorum manus, priora enim verba omni carere sensu perspicuum est, at ea felicissime restituit Vir Praeclarus Jacob. Gothof *ad L. 6. Cod. Theod. de Malef. & Mathem.* hunc in modum enimvero *si qui de sua suorumque levius,* Ulpianus scilicet mox dixerat eos qui de salute Principis consulunt capite puniri, jam addit *si qui de sua suorumque salute consuluerit levius* punitur, nempe deportatione aut alio



modo. Haec egregie Gothofredus ; sequentia vero intacta reliquit. Celeb. Schulting. putat ea sic posse constitui, *inter hos habentur etiam Vaticinatores, hi quoque plectendi sunt nisi tamen ut ait plura interciderint, quod facile crederem.*

De Vaticinatoribus etiam egit Paulus *Sent. Lib. 5. Tit. 21. §. 1.* ecce ejus verba: *Vaticinatores qui se Deoplenos adsimulant, idcirco ex civitate expelli placuit, ne humana credulitate publici mores ad spem alicujus rei corrumperebuntur, vel certe ex eo populares animi turbarentur. Ideoque primum fustibus caesi civitate pelluntur: perseverantes autem in vincula publica conjiciuntur, aut in Insulam deportantur.* Summo jure tales homines poena adficiuntur, cum nihil sit quo facilius vulgus moveatur, quam vaticiniis aliisque rebus quibus Religio immixta videtur. Innumeris hujusmodi casibus scatet omnis aevi historia, nec talia facile omittunt qui novas res moliuntur, exemplis ab aliis prolatis addi potest quod referunt Cic. *in Catilin. orat. 3. cap. 4.* & Sallust. *in Bell. Catilin. cap. 47.* de Lentulo qui praedicabat ex *Libris Sybillinis* regnum Romae tribus Cornelii portendi, Cinnae atque Sullae antea, se tertium cui fatum Urbis potiri erat enim ex gente Cornelia ut testatur Sallust. *ibid. cap. 55.* Non aliam rationem de Vaticinatoribus plectendis affert Ulpianus quam Paulus quoniam inquit nonnunquam contra publicam quietem imperiumque Populi Romani improbandas artes exercent. Plura forte ad haec illustranda afferri possent si rescriptum Divi Pii ad Pacatum Legatum Provinciae Lugdunensis cujus verba hic erant relata, nobis fata non eripuissent.

Denique & Divus Marcus, eum qui motu Cassiano vaticinatus erat & multa quasi extinctu Deorum dixerat, in Insulam Syrum relegavit. Hic pro extinctu legendum esse ex *Instinctu* monet Cel. Schulting. Avidius Cassius nobilissima familia natus, homo potens, ac eleganti ingenio, Marco Antonino adversus Marcomannos proficiscente, Imperium occupare tentavit, sed victus ac occisus fuit. Motum illum fuse narant Vulcatius Gallicanus in *Vita Avidii Cassii* (inter *Historiae Augustae Script. Tom. 1.*) ac Julius Capitolinus in *vita M. Anton. cap. 24.* verum (miremur negligentiam Histori-



corum?) neuter de hoc Vaticinio ne verbum quidem muffitarunt, procul dubio tamen fatis notabile fuit ut ejus mentio fieret, videtur enim ex eo motus ille, nomen *furoris Cassiani* quod ipsi tribuit Paulus in fugitiva *l. 7. C. ad L. Jul. Majest.* traxisse, quod conjicit A. Bynkersh. *Obs. Lib. 6. cap. 5.* Hunc Vaticinatorem Marcus pro sua clementia sola relegatione punivit. Modestinus autem in *L. 30. D. de Poen.* memorat rescriptum D. Marci, in hanc rem apprime notandum. *Si quis aliquid fecerit* (inquit Jurisc.) *quo leves hominum animi, superstitione numinis terrerentur, Divus Marcus hujusmodi homines in Insulam relegari jussit.* A. Bynkershoek loco modo laudato egregie ostendit id non esse intelligendum de illis qui religionem suam aliis modeste ut decet inculcare conantur, sed omnino de illis Impostoribus de quibus nobis nunc est sermo, quique sub praetextu religionis vulgus ad seditiones excitant. At si conjecturis indulgere liceret, facile crederem rescriptum cujus meminit Ulpianus, diversum non esse ab eo quod refert Modestinus, Divumque Marcum cum consuleretur de Vaticinatore Cassiano, rescripsisse illum esse relegandum in insulam Syrum, pariterque se jubere omnes qui hominum animos superstitione numinis territant, relegari. *Et sane* (ut cum verbis Ulpiani caput hocce finiam) *non debent impune ferre hujusmodi homines qui sub obtentu, & monitu Deorum quaedam, vel renunciant, vel jaectant, vel scientes eos fingunt, seu potius scientes confingunt cum id non improbet Cel. Schulting. ad b. l.*

Haec de Pauli & Ulpiani fragmentis, jam videamus quid de Magis ac Mathematicis constituere Principes quorum rescripta in Codicibus Theodosii & Justiniani extant.



## CAPUT QUARTUM.

*De Legibus quæ extant in Codice Theodosiano, & Justiniano.*

## §. I.

**I**N Codice Theodosiano, (*Libro ix Tit. 16.*) extat Titulus de *Maleficis, Mathematicis, & cæteris similibus*, similem Titulum in Codice suo retulit Justinianus, (*in Libro ix. Tit. 18.*) ibique multas leges ex Theodosiano exscripsit, at cum quibusdam diversitatibus, ut ubique observare licebit, quasdam in unum conflavit, alias prætermisit, cum tantum viderentur esse Temporariæ. Singula duce ac Auspice summo Gothofredo latius pertractabimus, hicque ut in præcedentibus ordinem Historicum quantum fieri poterit, sequemur. In inscriptione memorantur *Malefici*; generaliter omnes Magi ita vocantur, in specie tamen videntur esse, qui artem Magicam ad summum fastigium perduxerunt, Necromantici videlicet, qui animas ex inferis eliciunt, quosque *Maleficos ob facinorum magnitudinem vulgus appellat* ut est in *L. 5. & 7. C. h. t. De Mathematicis* jam satis dictum, sub cæteris similibus vero comprehenduntur omnes qui arte quacunque futura indagare conantur veluti Augures, Vaticinatores &c.

§. II. Prima lex quæ nobis occurrit est (1) *L. 2. C. h. t.* (de *L. 1.* enim jam egimus in *cap. 2. §. 15.*) Haec sunt verba *Dioclet. & Maxim. AA. & CC. Tiberio. Artem Geometriae discere atque exercere publice interest. Ars autem Mathematica damnabilis est & interdicta omnino. S. 13. cal. sept. Sirmii CC. Coss.*

Me-

(1) Haec Lex a Cod. Theod. abest.



Merito hic Geometria separatur ab arte illa Divinatoria quae sub nomine Matheseos vulgo circumfertur. Id jam tempore Ulpiani obtinuisse, Geometrasque honesto loco positos fuisse patet ex *L. 1. pr. D. de Extraord. Cognit.* ubi Geometria inter studia liberalia, de quorum mercede Praesides Provinciae jus dicere solent, connumeratur. An autem integrum in h. l. habeamus rescriptum, dubitari potest, nec de casti ad quem responsum est, nec de tempore quo editum est, quid statui potest.

§. III. Constantinus Magnus debellato Tyranno Maxentio, regno potitus, fidem Christianam amplexus est anno aerae nostrae vulgaris 312. Exinde omnem operam contulit ad evertendam religionem Paganam, & Christianam fulciendam. Hoc animo duas edidit constitutiones alteram ad Maximum Praefectum Praetorio, alteram ad Populum; extant in *L. 1. § 2. Cod. Theod. b. t.* Justinianus eas in unam conflavit & in Codice suo retulit in *L. 3. eod.* cujus haec sunt verba. *Imp. Constantin. A. ad Maxim. Nullus aruspex, (1) [nullus sacerdos, nullus eorum qui huic ritui adsolent ministrare ad] limen alterius accedat nec ob alteram causam, sed huiusmodi hominis (2) amicitia quamvis vetus repellatur: concremando illo aruspice qui ad domum alienam accesserit, & illo in Insulam (3) deportando post ademptionem bonorum, qui eum advocaverit suasionibus vel praemiis (4). Accusatorem autem huiusmodi criminis non delatorem, sed dignum magis praemio arbitramur. P. P. Calend. Feb. Romae Constantin. A. 5. § Licinio Coss 312.* Magnum illud evertendi Paganismi opus, non facile peragi poterat, nisi satis longo tempore, ac avitam religionem potius in desuetudinem trahendo, quam simul semelque extirpando. Nihil ergo magis expedire credidit Constantinus, quam aruspicum, aliorumque sacrorum ministrorum auctoritatem minuere. In hunc finem *b. l.* prohibet ne apud quem-

(1) Haec sunt ex *L. 2. Cod. Theod.* (2) *L. 1. Cod. Theod.* habet *quamvis vetus amicitia.* (3) *L. 1. Cod. Theod. detrudendo.* (4) *L. 1. Cod. Theod.* addit *superstitioni enim sua servire cupientes, poterant publice ritum proprium exercere.*



quemlibet admitterentur five Divinandi, five veteris amicitiae, five quacunque alia de causa, ne forte sub praetextu veteris consuetudinis animos a proposito suo averterent, & ad propria commoda converterent, bene gnarus quid possit Religionis ministrorum in Plebem autoritas. Gravissimas poenas propositas videmus adversus illos qui contra hanc legem fecerint, ignem in aruspice, & deportationem amissis bonis in eum qui vocaverit. Ratus est Imperator, nec immerito, severissime arcendam temeritatem eorum, qui facile omnia tentant, ad imminutam suam Majestatem iterum in pristinum fulgorem restituendam. Accusatoribus vero hujus criminis infame *Delatorum* nomen tribui vetat.

Haec ex duabus constitutionibus, Imperatoris Constantini nobis servavit Justinianus, at in Cod. Theod. ulterius quid additur. Nempe Imperator iisdem illis legibus quibus aruspice nam privatim excercere prohibuit, publice id permisit, ne violenta nimis ac subita sacrorum mutatio, animos perturbaret. De eo in *d. l. 1. Cod. Theod.* sic monet Praefectum Praetorio: *Superstitioni suae servire cupientes poterunt publice ritum proprium excercere*: & in *l. 2. eod.* populum sic alloquitur, *Qui vero id vobis (1) extimatis conducere adite aras publicas atque delubra, & consuetudinis vestrae celebrate solemnia, nec enim prohibemus praeteritae usurpationis officia libera luce tractari.* Haec omnia exscribere omisit Justinianus, quippe suo tempore nullum amplius usum habere poterant, Sacris Paganorum jam ubique abolitis, & Christiana persuasionem passim recepta. Sunt tamen observatione digna, luculenter enim mentem Constantini declarant. Satis hisce legibus fecisse sibi visus est, modo consuetudines cum aruspicebus caeterisque divinatoribus, eorumque secretas consultationes, abrumperet, majora ad opportuniora tempora reservaturus. Nec ipsi similis prohibitionis exempla defuere, sic enim Tiberius ipsos *aruspices secreto ac sine testibus consuli vetuit* Suet. in ejus vit. cap. 63. Ita etiam in Senatusconsulto de Bacchanalibus, constitutum, ne quis Bac-

chanal

(1) Pro *existimatis* quomodo etiam forte scriptum fuit.



chanal haberet, nisi consulto prius Praetore Urbano ac Senatu, cum non minus quam centum adessent Senatores. Vid. Liv. Lib. 39. cap. 41. Hujus legis autem subscriptio in *Cod. Justin.* proculdubio vitiosa est, exhibet enim annum 312. quo demum victo Maxentio, Constantinus religionem Christianam est amplexus, nec videtur prorsus eodem illo anno adeo duras leges promulgasse; rectius ergo se habere videtur subscriptio L. 1. § 2. *Cod. Theod. h. t.* annum 319. exhibens, septimum post interitum Maxentii, quod multo probabilius. Vid. Gothof. *ad d. LL. 1. § 2.* Caeterum Gothof. *ad d. L. 2.* putat ibi *arbitrariam poenam in aruspice* § *consultorem a Constantino mutato consilio constitui*, propter haec legis verba, *prohibemus --- poena contra eos proposita si contempserint legem*, quibus verbis poena non exprimitur. Putarem potius haec debere referri, ad ea quae ante aliquot menses Maximo scripserat in L. 1. *eod.* in qua poenam ignis expressam vidimus, ita ut hic etiam eandem poenam intelligat Constantinus, & video ipsum Gothofredum in notis legibus subjectis, *ad d. l. 2.* in vocem *poena* sic notare *Ignis L. 1. supr.* quod non videtur prae oculis habuisse cum commentarium scriberet.

Eodem plane animo quo has constitutiones promulgaverat Constantinus, biennio post anno 321. edidit & alteram eidem Maximo inscriptam, in L. 1. *Cod. Theod. de Pagan. § Sacrif.* qua permisit aruspicebus ut si quid *de Palatio aut caeteris operibus publicis degustatum fulgore esse constiterit*, possint suo more inquirere quid portendat, modo tamen eorum responsa ad Imperatoris scientiam perferantur, & a Sacrificiis privatis quae *specialiter prohibita sunt* (nempe L. 1. § 2. *h. t.*) abstineant. Id autem unice egisse Constantinum, ne ex istis portentis quid mali adversus ipsius imperium aut consilia quis moliretur, luculenter ostendit Gothof. *ad d. L. 1. Cod. Theod. de Pagan.* ibique solide Zozimi ac Baronii in Constantinum obtreccionem refutat. Caeteras ejus circa res Sacras constitutiones nostrum non est inquirere, ad eas potius quae ad Maleficos aliosque similes pertinent redeamus.

§. IV. Anno 321. de iis edidit Constitutionem idem Con-

F

stanti-



stantinus, in *L. 3. Cod. Theod. h. r.* five *L. 4. Cod. Justin. h. r.* en verba prout exhibentur in *Cod. Just. Imp. Constantinus ad Bassum P. U. Eorum est scientia punienda & severissimis merito legibus vindicanda, qui Magicis accincti artibus, aut contra salutem hominum moliti, aut pudicos animos ad libidinem deflexisse (1) detegentur. Nullis vero criminalibus (2) implicanda sunt remedia humanis quæsitæ corporibus, aut in agrestibus locis innocenter adhibita suffragia, ne maturis vindemiis metuerentur imbres, aut ventis (3) grandinisque lapidatione quaterentur: quibus non cujusquam salus aut æstimatio læderetur, sed quorum proficerent actus ne divina munera & labores hominum sternerentur. Dat. 10. Cal. Junii Aquilæie Crispo & Constantio Cæs. Coss. 321. Pro certo olim habitum fuisse vi carminum pudicos animos ad libidinem deflecti supra vidimus. Eadem ipsis potestas in vitas hominum tribuebatur, de quo luculentum extat testimonium apud Tacit. *Ann. Lib. 2. cap. 69.* ubi de morte Germanici, Reperiebantur solo ac parietibus erutæ humanorum corporum reliquæ, carmina, & devotiones, & nomen Germanici plumbeis tabulis insculptum, semiusti cineres ac tabe oblitæ, aliæque maleficia quæ creditur animas numinibus infernis sacrari. Non vero semper ad perniciem hæc sacra tendebant, morbi etiam sæpè carminibus sanabantur, testis sit Tibullus loco eleganti in *Lib. 1. Eleg. 5. v. 9. & seqq.* ubi iram Dominae flectere conatus, bene merita in eam a se collata sic refert.*

*Ille ego cum tristi morbo defessa jaceres,  
Te dior votis eripuisse meis.  
Ipseque ter circum lustravi sulfure puro,  
Carmine cum Magico præcinuisset anus.  
Ipse procuravi ne possent sæva nocere  
Somnia, ter sancta deveneranda mola.  
Ipse ego velatus lino, tunicisque solutis,  
Vota novem triviæ nocte silente dedi.*

(1) *L. 3. Cod. Theod. h. r. deflexisse.* (2) *L. 3. Cod. Theod. Criminalibus.* (3) *L. 3. Cod. Theod. ruentis grandinis lapid.*



& reliqua, quæ vide si versibus tenerrimo amore suspiratis delectari vacat, inque hæc omnia confer notas viri ipsis Musis deamati Jan. Broekhusii, qui ea ut solet eleganter illustravit. Quidam etiam Charactera aut similia gestiebant, quibus putabant morbos sanari, Am. Marcell. *Lib. 19. p. m. 152. Si qui remedia quartanæ, vel doloris alterius, collo gestaret &c.* Idem & circa fructus obtineri credebat vulgus, putabant nempe nubes posse repelli, certisque artibus licere cum grandine pacisci ut loquitur Seneca *Quæst. Nat. Lib. 4. cap. 6. §. 7.* ubi hæc refutat, cui adde Plin. *Hist. Nat. Lib. 30. cap. 2.*

Constantinus sive ipse cum Plebe senserit, sive, ut putat Gothof. *ad h. l.* non ausus fuerit superstitionem quæ tantas radices egerat fortius oppugnare, hic tantum prohibet usum carminum ad perniciem alicujus adhibitum, idque verè ac ex ratione juris; non enim interest quomodo quis occisus fuerit, nec etiam an occisus fuerit, modo animus adfuerit occidendi, *L. 1. D. ad Leg. Cornel. de Sicar.* Pœnam in *h. l.* non expressit Imperator, videtur tamen intellexisse supplicium capitale, sive id sit crux, aut crematio, aut decollatio, ad quæ summa supplicia refert Paul. *Sent. Lib. 5. Tit. 17. §. 3.* Nullis vero (inquit Imperator) *criminalibus*, sive ut rectius habetur in *L. 3. Cod. Theod. criminationibus implicanda sunt remedia* quæ sita hominibus aut fructibus. Hæc sua autoritate firmavit Justinianus, hanc legem in Codice suo referens; at eam admodum verbose sustulit Imperator Leo, omnesque incantatores, sive bono sive malo animo agant, supremum supplicium sustinere jussit Vid. Leon. *Const. 65.*

§. V. Constantius filius Constantini, odio singulari Magos persecutus est, ut patet ex acerbis legibus quas in eos edidit Hujus severitatis rationem, facile est reperire in illis quæ de Constantii vitiis refert Am. Marcel. *Lib. 21. p. m. 201. Cum esset in negotiis aliis principibus mediis comparandus, si affectatae dominationis ansam quandam falsam reperisset aut levem, hanc sine fine scrutando, fasque eodem loco ducens & nefas, Caligulae & Domitiani & Commodi immanitatem facile superabat: quorum aemulatus sævitiam inter imperandi exordia cunctos san-*



guine & genere se contingentes, stirpitus interemit. Addebatur miserorum aerumnis, qui rei Majestatis imminutae vel laesae deferebantur, acerbitas ejus & iracundae suspiciones in hujusmodi cuncta distentae. Et si quid tale increpuiisset, in quaestiones acrius insurgens quam civiliter, spectatores apponebat his litibus truces, mortemque longius in puniendis quibusdam si natura permitteret, conabatur extendi. Hisce addantur & haec verba ejusdem Marcell. Lib. 14. pag. 9. ubi & de Constantio, Utque aegrum corpus quassari etiam levibus solet offensis, ita animus ejus angustus & tener, quidquid increpuiisset, ad salutis suae dispendium existimans factum aut cogitatum, insontium caedibus fecit victoriam luctuosam. Haec de Constantii indole refert Ammianus, quae etsi longiora aliquanto, tamen cum ad propositum non inutilia videbantur integra exscribere non dubitavi. Hisce perspectis mirum non erit Constantium admodum in Magicae aut Mathematicae artis peritos saevisse, jam enim saepe vidimus, id genus hominum maxime suspectum esse, contra Rempublicam aut Imperatorem res novas moliri, & passim observare licet quo magis Principes sibi a populo metuebant eo magis etiam in eum saevisse.

Adversus omnia Paganorum sacrificia, legem promulgaverat Constantius, quae extat in *L. 4. Cod. Theod. de Pagan. & Sacr.* non addito anno, at in *L. 1. C. eod.* in qua eadem repertiuntur verba, additur annus 342, tribuiturque Constantino in Inscriptione, quae omnia procul dubio vitiosa sunt ut Observavit Gothof. in not. ad d. l. Constantinus enim anno 342. jam erat vita functus: debet omnino haec lex referri ad annum 353 aut 354. data est quippe ad Taurum Praefectum Praetorio, qui hanc dignitatem eo demum anno obtinuit vid. *Notit. Dignit. Cod. Theod.*

Quidquid sit, anno 357 legem patris adversus aruspices caeterosque similes renovavit & extendit Constantius in *L. 4. Cod. Theod. b. t.* quam Justinianus in *L. 5. C. eod.* retulit. *Imp. Constantius A. & Julianus C. ad Populum: Nemo Aruspicem consulat aut Mathematicum, nemo Ariolum. Augurum prava confessio conticescat. Chaldaei ac Magi & caeteri quos Malefi-*



eos vulgus appellat nec ad hanc partem aliquid moliantur. Sileat omnibus perpetuo divinandī curiositas. Etenim supplicio capitis ferietur, gladio ultore prostratus, (1) quicumque jussis nostris obsequium denegaverit. Dat. 8. Cal. Febr. Mediolani Constantio A. 9. & Juliano Coss. 357. Constantinus tantum prohibuerat consultationes privatas, publicas permiserat, at filius hac lege omnes omnino vetat, idque sub poena capitali: caeterum haud multa ad h. L. notanda sunt. Putabat olim Gothofredus pro *confessio* legendum *professio*, sed postea sententia mutata *confessio* retinere maluit. Recte idem observat verbum *consulere* proprium esse in hanc rem; sic Sueton. in August. cap. 94. de Agrippa qui prior consulebat, & in L. 15. §. 13. D. de Injur. Si quis Astrologus consultus &c. iterum verbum *curiositas* etiam ad hanc materiam aptatum esse Horat. Epod. od. 17. v. 77. ut ipse nosti curiosus, Catull. epig. 7. in fin.

*Quae nec pernumerare curiosi*

*Possint, nec mala fascinare lingua.*

§. VI. Eodem anno Constantius edidit & alteram constitutionem, qua perstrinxit summum artis Magicae fastigium, extat in L. 5. Cod. Theod. h. t. & in L. 6. C. eod. cujus haec sunt verba: Imp. Constantius A. & Julianus C. ad Populum: Multi Magicis artibus usi, (2) elementa turbare, vitam (3) insontium labefactare non dubitant, & manibus accitis audent ventilare, ut quisque suos conficiat malis artibus inimicos, hos quoniam naturae peregrini sunt, feralis pestis absumat. Dat. Prid. Non. Decemb. Mediolani Constantio A. 9. & Juliano Coss. 357. Si coacervanda essent testimonia quae apud Poetas extant, de Potentia Magorum in elementa, crassius satis exiret liber; si quis velit selectiora in hanc rem inspicere, videat modo quae allegavit Cl. Broekhus. ad Tibul. Lib. 1. eleg. 2. v. 43. in haec verba.

*Hanc*

(1) L. 4 Cod. Theod. habet Etenim supplicium capitis feret gladio ultore prostratus &c. quod eodem redit. (2) L. 5. Cod. Theod. habet ausi. (3) L. 5. Cod. Theod. vitas.



*Hanc ego de coelo ducentem Sydera vidi,*

*Fulminis haec rapidi carmine sistit iter.*

Videbitque putasse veteres, Magis nihil esse impossibile, omnibusque convenire quod de saga quadam praedicat Apulej. *Metam. Lib. 1. p. m. 105. potens caelum deponere, terram suspendere, montes diluere, manes sublimare, Deos infimare, Sydera extinguere, Tartarum ipsum illuminare.* Non minorem potestatem habere credebantur in manes, ut quotiescunque liberet eos ex sepulchris evocare, & futura praedicere cogere possent; id autem plerumque fiebat diris sacris, homines vel pueros immolando, vid. iterum quae habet Broekh. *ad illa Tibulli l. c. v. 45.*

*Haec cantu finditque solum manesque sepulchris*

*Elicit, & tepido devocat ossa rogo.*

Haec omnia ergo a Constantio hic prohibentur. In Cod. Theod. legitur *ausi pro usi* & Gothofredus ibi putat uno spiritu legendum *multi magicis artibus ausi elementa turbare*, & deinde *vitam infontium* &c; ita ut elementorum turbatio memoretur ab Imperatore tanquam medium necessarium ad vitam infontium labefactandam. Non tamen semper videtur necessarium fuisse elementa turbare ut aliquis perimeretur, potuitque facile Constantius illos qui elementa turbant inter naturae peregrinos numerare. Quidquid sit, hac lege damnantur qui Magicis artibus conantur inimicos suos interficere, hisque adduntur qui *manibus accitis audent ventilare.* De verbo illo *ventilare* late ac erudite agit Gothofred. *ad b. l.* idque refert ad Magicas caerimonias, susurrosque quibus utebantur ad animas ex inferis eliciendas. At putarem potius hic argui illos qui manibus evocatis, postea variis incantationibus vexant, coguntque ut diutius Dias luminis oras adspiciant, ita ut sensus sit *manibus accitis ipsos audent ventilare*, eodem plane sensu ac Tibullus salutarem Broekhusii manum expertus loco mox laudato v. 47.

*Jam tenet infernas Magico stridore catervas.*

Quod recte interpretatur, infernas catervas longius ex orco detinet. Verum haec sunt levia. Magis inter eruditos ambigitur quaenam poena hac lege sit proposita, hos inquit Imp.

quo-



*quoniam naturae peregrini sunt feralis pestis absumat.* Raevardus *Varior. Lib. 5. cap. 3.* per *feralem pestem* intelligit *vivicomburium*. Gothofredus vero ad hanc Legem, cum Scholiastis Basilicorum id interpretatur de poena Bestiarum, ita ut per *feralem pestem* intelligatur supplicium *quasi in quo ferae adhiberentur*. Et omnino inquit suffragatur, *legis ratio, hos quoniam naturae peregrini sunt feralis pestis absumat, scilicet naturae peregrini ferali jam non humano supplicio adficiendi.* Hisce rationibus addit & aliam, quod poena Bestiarum tunc temporis in aliis criminibus veluti Plagio sit usurpata. At (quod tamen pace tua Magne Gothofrede dixerim) verior mihi videtur sententia Raevardi, vox *Pestis* enim, ut notum est, accipitur pro totali excidio, quod melius videtur convenire supplicio ignis quam bestiarum, *Feralis* autem saepe dicitur de eo quod Diis manibus aut igni sacrum est. Verum quod multo gravius puto, inter summa supplicia sub Imperatoribus usitata, poena ignis fuit omnibus aliis atrocior habita, ceu id ostendit Cel. Schulting. *ad Paul. Sent. Lib. 5. T. 17. §. 3. not. 6.* hanc poenam autem jam ante Constantii tempora, Magis (in specie illis de quibus hic agitur,) irrogatam fuisse, colligi potest, non tantum ex loco Luciani a Cel. Schultingio laudato *ad Paul. Sent. Lib. 5. Tit. 23. §. 17.* sed etiam ex ipsissimis ibi Pauli verbis ut supra (cap. 3. §. 3.) observavimus. Hisce positis non video quare Constantius, qui id genus hominum singulari odio persecutus est ut ipse notat Gothof. *ad L. 6. Cod. Theod. b. t.* ipsis imposuisset poenam mitiorem, praesertim cum gravior antea non fuerit inusitata, potius crederem illum poenam exasperasse quam minuisse.

Non minus autem poenae ignis ratio legis suffragatur: per *naturae peregrinos* enim nihil aliud intelligit Constantius, quam quod ipse in *L. 6. eod.* expressit per *humani generis inimicos*, & Valentinianus in *L. 11. eod.* per *communis hostes salutis*, ex eo vero quod in aliis criminibus veluti Plagio poena Bestiarum sit usurpata, non sequitur id in gravioribus etiam obtinere. Sed de eo jam satis superque; ultimum quod ad h. l. mihi notandum venit, est quod nescio quo fato, errore procul du-



dubio orto ex nimia festinatione, Gothofredus scripserit hanc constitutionem esse Pagani Principis, cum omnibus notum sit, Constantium fuisse sacris Paganis maxime infensum, at partibus Arrianorum deditum.

§. VII. Anno 358. prodiit tertia Constantii lex, qua ulterius persecutus est qui artes prohibitas excercent, eaque confirmantur quae attulimus de causa odii ejus adversus Magos aliosque similes; extat in *L. 6. Cod. Theod.* sive *L. 7. Cod. Justin. b. t.* en verba prout in Codice nostro repraesentantur: *Imp. Constantius A. & Julianus C. ad Taurum P. P. Etsi excepta tormentis sunt corpora honoribus praedictorum, praeter illa videlicet crimina quae legibus demonstrantur: etsi omnes Magi in quacunque sint parte terrarum humani generis inimici credendi sunt, quoniam tamen (1) qui in Comitatu nostro sunt ipsam pulsant propemodum Majestatem, si quis Magis, (2) vel Magicis carminibus (3) adsuetus, qui Maleficus vulgi consuetudine nuncupatur, aut Aruspex, aut Ariolus, aut certe Augur, vel (4) Mathematicus, aut enarrandis (5) somniis occultans artem aliquam Divinandi, aut certe aliquid horum simile excercens, in Comitatu meo vel Caesaris fuerit deprehensus praesidio dignitatis exutus (6) cruciatus & tormenta non fugiat. Si vero (7) convictus fuerit (8) & ad proprium facinus detegentibus repugnaverit pernegando, sit eculeo deditus, ungulisque sulcantibus latera perferat poenas proprio dignas facinore. Dat. 3. Non. Jul. Arimini Titiano (9) & Cereale Coss. 358.* Variarum personarum jure nostro a Quaestionibus excusantur, veluti Milites *L. 8. C. de Quaest.* Decuriones *L. 16. C. eod.* Senatores *L. 10. C. de Dignitat. (Lib. 12.)* Qui nomine eminentissimorum ac perfectissimorum veniunt eorumque liberi usque ad pronepotes *L. 11. C. de Quaestion.* Quinam autem hoc nomine designabantur discernere

(1) *L. 6. Cod. Theod. tamen quoniam.* (2) *Cod. Theod. si quis Magus.* (3) *Cod. Theod. carminibus.* (4) *Cod. Theod. vel &.* (5) *Cod. Theod. narrandis.* (6) *Cod. Theod. deest exutus.* (7) *Cod. Theod. deest vero.* (8) *Cod. Theod. deest fuerit &.* (9) *Cod. Theod. Datiano.*



scere possumus apud Pancirolli *comment. ad Notit. Dignit. Imper. Orient. cap. 2. & 3.* In his omnibus solum crimen Laesae Majestatis excipiebatur *L. 16. C. de Quæst. L. unic. Cod. Theod. ad Leg. Jul. Majest.* idque Imperator his indigitat verbis *præter crimina quae legibus demonstrantur.* Addi autem jubet crimen eorum qui in Comitatu Imperatoris aut Caesaris Magicas artes excercent. *Comitatus* Imperatoris aut Caesaris, proprie est quod vocamus Aulam, constatque iis personis quae Principem comitari solent Vid. Gothof. in *Gloss. Cod. Theod. & Guthier. de Off. Dom. Aug. Lib. 2. cap. 5. init.* Ne autem vetitae artes ab illis excerceantur specialiter prohibet Constantius, eadem ratione qua jam vidimus consultationes circa Principes semper fuisse prohibitas, quia nempe *ipsam propemodum pulsant Majestatem.* Si ergo quis talis in Comitatu Imperatoris vel Caesaris deprehensus fuerit, vult lex ut *praesidio dignitatis exutus*, diris cruciatibus torqueatur *si convictus ad proprium facinus detegentibus repugnaverit pernegando*, sic verba jacent in *Cod. Theod.* in nostro Codice autem *si vero convictus fuerit & ad &c.* Varie haec verba tentat Gothof. nec revera sensum idoneum efficiunt, vel pro *ad proprium* legit *ad properum*, id est, *valde properum seu valde foedum*, vel *si convictus ad properum pro convictus omnibus modis & ad foeditatem usque.* Sed haec nimis videntur subtilia, quod ultimum proponit facile recipi potest, nempe pro *ad legendum at*, quod sensum planum in utroque Codice efficit, modo in Codice nostro deleatur particula *&*, *si convictus fuerit, at proprium facinus detegentibus repugnaverit pernegando*, id est, si convictus fuerit, attamen per obstinatam infitiationem repugnaverit illis qui proprium suum facinus detexere, ut tunc sit eculeo deditus &c. Notandum autem est Constantium hic non singularem poenam proponere illis qui in Comitatu suo vetitas artes excercent, ipsis tantum adimit privilegium quo gaudebant, ne torqueri possent, ita ut post hanc legem aequae ac alii Quaestionibus obnoxii sint, ad eruendam veritatem, deinde vero statutis poenis plectendi.

Caeterum Vir Cl. Valesius *ad Amm. Marcell. Lib. 19. p. 173.* subscriptionem hujus legis sollicitat ac pro *Datiano* (in



Cod. Just. male legitur *Titiano*) & *Cereale Coss.* substituit Consules anni sequentis *Eusebium* & *Hypatium*, at nulla addita ratione. Ex eo vero quod (ut Am. Marcell. refert) Anno 359. cruentae exercitae fuere quaestiones de Magis aliisque similibus, non sequitur eo anno hanc legem fuisse promulgatam, quin potius crederem legem nostram hisce quaestionibus originem dedisse. Potest ulterius ratio historica ac maxime idonea hujus legis erui, ex eo quod narrat Amm. Marcell. *Lib. 18. p. 117. ad Ann. 358.* de Barbatione qui in Comitatu Imperatoris vates consuluerat, ipsique magnum discrimen praedictum fuerat. Litteris, quas ab uxore acceperat, quibus eum orabat ne ad imperium admissus, ipsi matrimonium Euseriae tunc reginae anteponeret, ad Arbetionem delatis. *Hoc indicio ille confusus ut erat ad criminandum aptissimus Principi detulit, atque ex usu, nec mora ulla negotio tributa nec quiete, Barbatio Epistolam suscepisse confessus, & mulier scripsisse documento convicta non levi cervicibus interiere praecisis.* Hisque punitis quaestiones longe serpebant, vexatique multi nocentes sunt & innocentes. Haec Ammianus, ex quibus probabile fit Constantium hac occasione legem nostram edidisse. Plura vide huc pertinentia apud Gothof. *ad h. l.* qui conjicit nec immerito haec adeo severe statuisse Constantium in Comitatu suo & Juliani Caesaris, *ne ad altiora celsius anhelantem Juvenis Principis animum Mathematici impellerent*, quippe jam Constantius Juliano invidebat si bique ab eo metuebat ut patet ex Amm. Marcell. *Lib. 15. p. 34. & Lib. 16. p. 85.*

At si subscriptio hujus legis bene se habet, quantum ad nomina Consulium, proculdubio vitiosa est in nomine loci, exhibet enim *Dat. Arimini*, certum tamen est Constantium hoc anno in Pannonia egisse. Putat Gothofrédus legendum esse *Aciminei*, cum mentio fiat urbis Aciminei in Pannonia apud Ptolomaeum, & in Itinerariis Antonini & Peutingeri. Potius tamen hic substituendum videtur *Syrmii*, patet enim ex Ammiano *p. 119* haec *apud Syrmium* fuisse peracta.

§. VIII. Magos etiam ultra mortem persecutus est Constantius. Bona damnatorum olim fisco addicebantur *L. 1. D. de*

*Bon.*



*Bon. Damn. L. 4. C. de Bon. Proscript.* id mutavit Constantius. *L. 2. Cod. Theod. de Bon. Proscript.* iussit ut liberis damnatorum bona relinquerentur usque ad tertium gradum, sed excepit bona Damnatorum ob crimen Majestatis aut Magiae & in illis antiquam poenam locum habere iussit. Id constituerat Anno 356. sed bienno post abrogavit, quatenus liberis a Confiscatione immunitatem tribuebat, iussitque ut omnia bona damnatorum quacunque de causa ad fiscum deferrentur *L. 4. Cod. Theod. de Bon. Proscript.* quod iterum a Valentiniano & Valente Anno 364. in *L. 6. Cod. Theod. eod.* mutatum est, omnibusque liberis cujuscunque gradus aut sexus, quorumlibet damnatorum exceptis solis reis Majestatis (non Magiae) integra bona relicta. Sed de hoc jure ulterius differere nostrum non est.

§. IX. Constantio successit Julianus, Princeps fama admodum dubia. Statim atque Imperium adeptus est veterem Deorum cultum restituit; unde iterum Aruspicum, Augurum, Sacerdotum invaluit auctoritas Amm. Marcell. *Lib. 22. p. 208.* Nec dubium Mathematicos aliosque quos Constantius legibus profligaverat etiam irrepsisse, praesertim si attendamus ad ea quae refert Amm. Marcell. *Lib. 25. pag. 294.* ubi de Juliano, *Praesagiorum sciscitationi nimiae deditus, ut aequiparare videretur in hac parte Principem Hadrianum: superstitiosus magis quam legitimus sacrorum observator.* Quid tamen in hanc rem statuerit Julianus nobis non servarunt Juris nostri compilatores, noluerunt enim auctoritate sua firmare leges adversus religionem Christianam latas.

§. X. Jovianus Imperium modo septem menses tenuit; eum secutus est Valentinianus Anno 364. qui fratrem Valentem mox imperii socium assumpsit, Augustum declaravit, ipsique Orientem reliquit.

Paulo post quam ad Imperium pervenit Valentinianus, edidit constitutionem adversus sacra nocturna ac Magica quae extat in *L. 7. Cod. Theod. h. t. Ne quis deinceps nocturnis temporibus, aut nefarias preces, aut Magicos apparatus, aut sacrificia funesta celebrare conetur, detectum atque convictum, competenti*



*animadversione mactare perenni auctoritate censemus Dat. 5. Id. Sept. Divo Joviano A. & Varroniano Coss. 364*

Hic autem non prohibentur sacra Gentilitia nisi sint nocturna aut Magica, Valentinianus enim *Princeps* ut loquitur Am. Marcel. p. 433. *inter religiones medius* nunquam jussit certos ritus observari, sed unicuique liberam more suo Deum colendi facultatem reliquit quod ipse testatur in *L. 9. Cod. Theod. h. t.* Necessarium tamen duxit coetus nocturnos aut Magica sacrificia non amplius celebrari. Vid. Gothofr. *ad h. l.*

§. XI. Anno deinde 371. prodire duae Constitutiones ejusdem Valentiniani Senioris in *L. 9. & 10. Cod. Theod. h. t.* quibus connectenda *L. 5. Cod. Theod. de Indulgent. crim.* ut id accurate observavit & erudite ex Historia horum temporum probavit Gothofredus *ad dd. LL.* idque eo duce hic etiam facere conabor.

Ammianus Marcellinus *Lib. 28. in init.* multa refert quæ ad nostram legem pertinent quorum hæc est summa. Apud Olybrium Præfectum Urbi, Chilo quidam & ejus uxor, veneficii accusarunt Sericum quendam Organarium, Asbolium palestritam, & Aruspicem Campensem. Cum vero propter Olybrii morbum diuturnum negotio mora neceretur, deprecantibus accusatoribus, id demandatum est Maximino Præfecto Annonæ homini crudeli ac scelesto. Is potestatem nocendi avidè amplexus, *maligna relatione docuit Principem* multa atrocia facinora in urbe perpetrari, inter quæ multa *imminutæ Majestatis*, quæque nisi gravissimis poenis non possent coerceri. *Valentinianus ut erat acer vitiorum inimicus magis quam severus, uno proloquio, (1) in hujusmodi causas . . . . . omnes quos prisci juris justitia, divorumque arbitria, quaestionibus exemere cruentis, si postulasset negotium, statuit tormentis affligi.* Hac permissione impetrata, Maximinus mirum in modum per caedes & sanguinem grassatus, multos etiam nobilissimos non minore injustitia quam crudelitate necavit. Inter caetera *Mors Marini causarum defensoris eminuit,*  
quæ

(1) Quid hoc sit docet Vales. *ad Am. Marc. in not. p. 15.*



quem ut ausum Hispanillæ cujusdam artibus pravis adfectasse conjugium, transeunter indiciorum fide discussa, supplicio lethali damnavit. Ammian. p. 359. cum secuti Cethegus Senator, Alypius nobilis adolescens, tandem Amantius Aruspex, præ caeteris notus, delatus quod ob prava quaedam implenda, ad sacrificandum esset adscitus ab Hymetio, viro præclaræ indolis quique Proconsule Africam rexerat, cumque id Amantius negaret, productum commonitorium manu Hymetii scriptum, quo constitit quid ipse voluerit. Inde Amantius poena capitali punitus. Hymetius deductus ad Ampelium (qui tunc loco Olybrii Praefectus urbi erat) & Maximinum, ad Imperatorem appellavit, super hoc princeps consultus Senatui negotium dedit qui Hymetium relegavit. At Valentiniano maxime stomachum movit quod hominem addictum ut ipse proposuerat morti, clementiori sententia didicerat plexum. Ob hæc & similia multa, quæ cernebantur in paucis, omnibus timeri sunt coepta. Et ne tot malis dissimulatis, paulatimque serpentibus, acervi crescerent acumnarum: nobilitatis (1) decreto legati mittuntur. . . . oraturi ne delictis supplicia sint grandiora, neve senator quisquam inusitate & illicito more tormentis exponeretur. (2) Qui cum intromissi in Consistorium (3) hæc referrent, negantem Valentinianum se id statuisse & calumnias perpeti clamitantem, moderate redarguit Quaestor Eupraxius (4), hacque libertate emendatum est crudele praeceptum, supergressum omnia diritatis exempla. Haec Ammian p. 360. quæ, si conferamus dictas leges, patebit ad eas pertinere. Valentinianus Senatui iram suam deprecanti sic rescripsit in L. 5. Cod. Theod. de Indulgent. crim. Indulgentia Patres conscripti quos liberat notat, nec infamiam tollit, sed poenae gratiam facit. In uno hoc aut in duobus reis ratum sit.

Qui

(1) Id est ordinis Senatorii. (2) erant enim a Tormentis immunes ut supra diximus. (3) id est secretum principis Consilium Vid. Guther. de Off. Dom. Aug. Lib. 2. cap. 18. (4) Quaestoris officium erat Leges, Epistolas, Rescripta &c. dictare & subscribere Vid. Guther. de Off. Dom. Aug. Lib. 2. cap. 18.



*Qui indulgentiam senatui dat damnat Senatum. Dat. 14. Cal. Jun. Trev. Grat. A. 2. & Prob. Coss. 371.* Hisce subjicienda verba *L. 9. Cod. Theod. b. 1.* videntur enim cohæsisse, *Aruspicinam ego nullum cum Maleficiorum causis habere consortium judico, neque ipsam aut aliquam praeterea concessam & majoribus religionem, genus esse arbitror criminis; Testes sunt leges a me in exordio imperii mei datae, quibus unicuique quod animo imbibisset colendi libera facultas tributa est. Nec Aruspicinam reprehendimus, sed nocenter exerceri, vetamus.* Cum magna pars Senatus jure aut injuria criminis accusaretur, orarunt patres ut ipsis Imperatorem indulgentiam tribueret qua omnes simul ac semel a majori perquisitione liberarentur: Valentinianus vero honore Senatus, seu potius ut suspicatur Gothofredus *ad b. 1.* desiderio singula accurate inquirendi, ipsis & ad veritatem & ad sua commoda consentaneæ, negat se posse integro Senatui indulgentiam concedere, quia indulgentia est tantum a poena non ab infamia liberatio, idque foret potius totum Senatum damnare quam absolvere, se vero quibusdam reis deprecantibus facile indulgentiam daturum confitetur. Quod vero ad Aruspicinam pertinet, exemplum Constantini secutus, eam omnemque aliam avitam religionem, nullum cum maleficiis consortium habere judicat, ita ut eam excercere publice ac tanquam cultum Deorum permittat, neutiquam vero ob solam curiosam circa res Imperatoris aut imperii indagationem.

Valentinianus sic munere erga Senatum functus, noluit tamen disquisitionem in haec crimina cessare, immo jussit ut haec ad se remitterentur ideoque in haec verba rescripsit ad Ampe-  
*lium Praef. Urbi in L. 10. Cod. Theod. b. 1. Quia nonnulli ex ordine Senatorio Maleficiorum insimulatione atque invidia stringebantur, idcirco hujusmodi negotia urbanae Praefecturae permisimus. Quod si quando hujusmodi inciderit quaestio quae*  
*Judicio memoratae sedis dirimi vel terminari posse non creditur,*  
*eos quos negotii textus amplectitur una cum gestis omnibus prae-*  
*sentibus atque praeteritis, ad comitatum mansuetudinis nostrae*  
*solemni observatione transmitti praecipimus, Dat. 8. Id. Dec.*  
*Grat. A. 2. & Prob. Coss. 371.* Praefectus urbis erat judex  
 or-



ordinarius Senatorum *L. 13. Cod. Theod. de accusat. L. 10. Cod. Theod. de Poen.* hac lege vero jubet Imperator ea quae erunt majoris momenti crimina ad se deferri, reosque ad comitatum suum mitti *una cum gestis omnibus praesentibus & praeteritis*, quod in jure nostro vocatur elogium, id est annotatio & enarratio criminis. Vid. Brissón. *De Verb. Sign. in voce elogium* & Vales. *in not. ad Am. Marcel. p. 15.*

§. XII. Dum haec in Occidente gerebantur ad comprimentos Magos & Mathematicos, Valens in Oriente non minus in eos saeviebat, ut patet ex *L. 8. Cod. Theod. b. t.* cujus ultima tantum pars extat in *L. 8. C. eod.* Hujus legis iterum occasionem, ut videtur, prolixè refert Am. Marcel. *Lib. 20. in init.* quod & hic cum secuti aliquanto brevius facere conabimur. Palladius quidam cum Heliodoro *fatorum per genituras interprete*, accusarunt Fidustium Praefidatu functum; nomen *Imperaturi post Valentem detestandis praesagiis didicisse secretim.* Fidustius confessus est se cum Hilario & Patricio vaticinandi peritis, consuluisse de futuro Imperio, ipsisque praedictum fuisse Valenti successurum principem optimum nempe Theodorum, virum qui (ut pulchre inquit Ammianus *p. 384*) *officio locoque quem retinebat semper superior videbatur*; addebat Fidustius, Theodorum haec didicisse per Euserium virum egregium ac antea Asiae Propraefectum. Hi statim in carcerem conjuncti cum multis aliis suspectis, Theodorus qui Constantinopoli erat inde correptus ac Antiochiam ductus, constitutum judicium datique cognitores inter quos erat Modestinus Praefectus Praetorio, Ammian. *p. 386. in fin.* interrogati Patricius & Hilarius, cumque diverse responderent, tormentis coacti omnia accurate exponere. Tum Hilarius exorsus confessus est ea quae refert Am. Marcel. *p. 387, 388.* quae etsi longiora tamen hic referenda, cum non modo ad Historiam nostram pertineant, sed etiam exemplum prebeant insignè de notabili futura inquirendi modo. Haec sunt ipsa Ammiani verba: *Construximus inquit (Hilarius) magnifici judices, ad cortinae similitudinem Delphicae, diris auspiciis de laureis virgulis infausam hanc mensulam quam videtis, & imprecatio-*  
ni-



nibus carminum secretorum, Choragiisque multis ac diuturnis ritualiter consecratam, movimus tandem, movendi autem, quoties super rebus arcanis consulebatur, erat institutio talis. Conlocabatur in medio domus emaculatae odoribus Arabicis undique, lance rotunda pure superposita, ex diversis materiis fabricata: cujus in ambitu rotunditatis extremo, elementorum viginti quatuor scriptiles formae incisae perite dijungebantur spatiis examinatae (1) dimensis. Hac linteis quidam indumentis amictus, calceatusque itidem linteis soccis, torulo (2) capite circumflexo, verbenas felicitis arboris gestans, litato conceptis carminibus numine praescitionum autore, cerimoniali scientia supersistit, cortinulis (3) pensilem annulum librans arctum ex Carpathio (4) filo perquam levi mysticis disciplinis initiatum, qui per intervalla distincta retinentibus litteris incidens saltuatim, heroos efficit versus interrogationibus consonos, ad numeros & modos plene conclusos, quales leguntur Pythici vel ex oraculis editi Branchidarum (5). Ibi tum quaerentibus nobis qui praesenti succedet imperio, quoniam omni parte expolitus fore memorabatur, & adsiliens annulus duas perstrixerat Syllabas ΘΕΟ cum adjectione litterae (6) postrema, exclamavit praesentium quidam Theodorum praescribente fatali necessitate portendi. Nec ultra super negotio est exploratum, satis enim apud nos constabat hunc esse qui poscebatur.

Haec Ammianus ad quae fati multa notari possent ni id nimis extra institutum nostrum evagaretur. Eandem historiam referunt & alii Scriptores, verum de modo quo sacrum illud peractum fuit inter eos non convenit. Diversitates collegit Vales in not. ad h. l. Quidquid sit de re constat. Hisce cognitis ac Theodoro convicto se ea scivisse, omnes cum plurimis aliis qui in suspicionem inciderant, Imperator cognitorum con-

(1) Vales. mallet *examine*. (2) Valesio magis placet *capiti*, Torulus autem est fascia seu vitta. (3) *Cortinulae* sunt vela ex quibus annulus dependet. (4) Valesius mallet *Carpasio* id est linteo. (5) Branchidae locus erat in agro Milesio supra Panormum celebris Apollinis oraculo. Vid Vales. ad h. l. (6) Id est Litterae Δ.



consultationi respondens sub uno proloquio jubet occidi. Ammian. p. 389. Multa hic nefandae crudelitatis monumenta narrantur sed nihil singulare habent, hoc unice notandum quod refertur p. 390. *Deinde congesti innumeri codices, & a-cervi voluminum multi sub conspectu Judicum concremati sunt, ex domibus eruti variis ut illiciti ad leniendam caesorum invidi-  
diam, cum essent plerique liberalium disciplinarum indices va-  
riarum & juris.*

Hicce ergo ut videtur commotus Valens, constitutionem nostram L. 8. Cod. Theod. b. t. edidit, nec abs re suspicatur Gothofredus eam esse eandem illam responsionem cognitori-  
bus datam quam memorat Ammian. l. c. saltem inscriptio est ad Modestinum qui ut vidimus erat inter judices. Legis ver-  
ba haec sunt: *Cesset Mathematicorum tractatus, nam si qui publice aut privatim in die noctuque deprehensus fuerit in cohibi-  
to errore versari, capitali sententia feriatur uterque. Neque enim dissimilis culpa est prohibita discere quam docere Dat. 11. Id. Decemb. Constantin. Valentiniano & Valente AA. Coss.* Prohibetur hic qualiscunque artis Divinatoriae usus, publi-  
cus, privatus, noxius, innoxius, idque sub poena capitali, tam consulentis quam respondentis, quia *Culpa similis est pro-  
hibita discere quam docere* quae sola verba reperiuntur in L. 8. C. b. t. reliqua praetermissa sunt. Poenam non definit Valens, at ex Ammian. Marcell. p. 389. patet omnes hujus criminis reos fuisse strangulatos, praeter Philosophum Simonidem, qui ob singulare odium vivus fuit combustus. Dubium au-  
tem non est hic sub nomine Mathematicorum etiam Magos comprehendi, quod saepe fit, ut passim apud Historicos aliosque observare licet, & revera quae ex Ammiano retulimus proprie pertinent ad ea quae vulgo Magis tribuuntur. Caeterum cum huic legi non subjiciatur annus aut Consulatus quo lata fuit nec id liquido ex Ammiano definiri queat, nihil certi de eo statuere possumus. In Codice Justiniano quidem subjicitur annus 365, at recte observat Gothofredus, eam ad hunc annum re-  
ferri non posse; data est enim Modestino Praefecto Praetorio, qui successit Auxonio adhucdum Praefecturam gerenti ad



extremum anni 369, ut patet ex Historicis & *L. 2. Cod. Theod. de Legitim. Haeredit.* An vero referri debeat ad Consulatum Valentiniani & Valentis tertium anno 370, an ad quartum anno 373 ambigit Gothofredus. Putat tamen (quod & verissimum credo) potius pertinere ad annum 370 quia data fuit Constantinopoli in quam urbem ex Antiochia eo anno revertit Valens, & praesertim quia ab illis qui ea quae supra vidimus narrant, nulla fit mentio Consulatus Modestini, qui Consul fuit anno 372.

§. XIII. Malefici adeo saepe declarati fuerant *hostes publici, humani generis inimici, naturae Peregrini*, ut quidam putarent in eos licere quae vulgo in hostem publicum licent, id est eos occidere. Id praesertim eveniebat illis qui certamine Circensi victi erant; credebantur nempe Agitatores sive Aurigae equos aliorum carminibus ac veneficiis labefactare, ut eo facilius victoriam reportarent, quod erudite ac prolixè probatum ivit Gothofred. *ad L. 11. Cod. Theod. b. t.* & ex eo quod de Auchenio Auriga refert Amm. Marcel. *Lib. 26. p. 314.* facile colligi potest. Victi autem furore incensi adversarios sub praetextu Maleficii criminis saepe interficiebant. Ad malum illud reprimendum prodiit Valentiniani junioris, & Theodosii Magni constitutio quam habemus in *L. 11. Cod. Theod. b. t.* & in *L. 9. C. eod.* en verba: *Quicumque Maleficiorum labe pollutum audierit, deprehenderit, occupaverit, illico ad publicum pertrahat (1), & Judicium (2) oculis communis hostem salutis ostendat. Quod si quisquam ex Agitatoribus, [id est Aurigis] (3) seu ex quolibet alio genere hominum, contra hoc interdictum (4) venire tentaverit, aut clandestinis suppliciis etiam manifestum reum Maleficae artis oppresserit (5), ultimum supplicium non evadat, geminae suspicioni obnoxius, quod aut publicum reum, ne facinoris socios publicaret, severitati legum, & debitae subtraxerit quaestioni, aut proprium fortassis inimicum sub huiusmodi (6) vindictae nomi-*  
ne

(1) *L. 11. Cod. Theod. protrahat.* (2) *L. 11. Cod. Theod. Judicium.* (3) in *L. 11. Cod. Theod.* abest *id est Aurigis* quod revera delendum videtur. (4) *L. 11. Cod. Theod. edictum.* (5) *L. 11. Cod. suppresserit.* (6) *L. 11. Cod. Theod. huius.*



ne consilio atrocior confecerit. Dat. 17. Cal. Sept. Romae Timasio & Promoto Coss. 389. Ad hanc legem adeo accurate commentatus est Gothofredus ut ne minimum mihi reliquum fecerit, praeter ad verbum exscribendi, aut (quod malo) Lectorem ad ipsum remittendi copiam.

§. XIV. Ultima tandem quae in libris nostris reperitur adversus Maleficos, Mathematicos, caeterosque similes constitutio extat in L. 12. Cod. Theod. h. t. quam Justinianus retulit in L. 10. C. de Episcop. Audient. Partem facere videtur prolixae constitutionis Honorii & Theodosii circa processum (ut vocatur) criminalem, & cujus multa si non omnia habemus conjunctis L. 5, 6. Cod. Theod. de exhib. reis L. 7. Cod. Theod. de Custod. reor. L. 2. Cod. Theod. ut intra annum crim. act. term. L. un. Cod. Theod. ne pastor. dent. fil. nut. L. 13. Cod. Theod. de fid. test. L. 3. Cod. Theod. de superexact. L. ult. Cod. Theod. de Abolit. L. 12. Cod. Theod. de Malefic. Omnes enim hae leges inscriptae sunt Caeciliano. P. P. eundemque exhibent annum 409 diemque 12 Cal. Febr. si legem nostram & L. ult. de Abolit. excipias, quae diem 8 Cal. Febr. habent: sed erroribus legum subscriptiones scatere neminem fugit; adde quod nec hujus L. 12. de Malef. subscriptio congruit cum subscriptione L. 10. C. de Episc. Audient. adeo ut facile utraque vitiosa esse possit. Quidquid sit, Mathematicos (ajunt Impp.) nisi parati sint, codicibus erroris proprii sub oculis Episcoporum incendio concrematis Catholicae religionis cultui fidem tradere, nunquam ad errorem primum redituri, non solum Urbe Roma sed etiam omnibus civitatibus depelli (1) decernimus. Quod si hoc non fecerint, & contra clementiae nostrae salubre constitutum in civitatibus fuerint comprehensi (2), vel secreta erroris sui & professionis insinuaverint, deportationis poenam excipiant, Dat. Cal. (3) Feb. Raven. Honor. 8. Theodos. 3. AA. Coss. 409.

Re-

(1) L. 12. Cod. Theod. h. t. pelli. (2) L. 12. Cod. Theod. deprehensi. (3) L. 12. Cod. Theod. Dat. 8 Cal.



Requirunt Imperatores a Mathematicis, ut libris suis combustis religioni Catholicae fidem tradant ipsis tunc (ut Tiberius olim deprecantibus) se veniam daturos pollicentur. Si vero id noluerint duplex poena in ipsos proponitur, primo nempe ut omnibus civitatibus expellantur. At si adversus hanc legem fecerint, ac iterum in civitatibus deprehendantur, aut artem suam alios docere conentur, tunc demum deportari jubentur. At hic mirari licet clementiam Imperatorum; quam exigua haec poena, si conferatur cum illis quas supra a Constantio aliisque propositas vidimus! Sed jam plus semel observavimus, quo magis Principes sibi a conjurationibus metuebant eo magis in Mathematicos &c. saeviisse.

§. XV. Vidimus quantum ad poenas, semper acerbe habitos fuisse Magos ac Mathematicos, non minus id ipsis contigit in indulgentiis criminum. Quando nempe aliquod improvissum gaudium oriebatur veluti ob partum liberorum, ob victoriam reportatam, solebant Imperatores reis criminum indulgentiam concedere; Vid. Gothof. *ad Tit. Cod. Theod. de Indulg. crim.* sed semper excipiebantur rei atrociorum criminum & inter eos Malefici. Valentinianus senior primus edidit constitutionem qua reis veniam dedit ob Festum Paschatis *L. 3. Cod. Theod. de Indulg. crim.* Sed excipiuntur *Sacrilegi, rei in Majestatem, & in mortuos, Venefici sive Malefici, adulteri, raptores, homicidae*, quod postea semper observatum ut in *L. 4. eod.* & in *L. 6. eod.* quæ est Valentiniani junioris & in qua nominatim excipitur, *qui noxiis quaesita graminibus & diris immurmurata secretis, mentis & corporis venena composuit*, iterumque in *L. 7. eod.* ac denique in *L. 8. eod.* quæ generalem & perpetuam indulgentiam Paschalem continet.

§. XVI. Judex ordinarius hujus criminis proculdubio erat Praefectus Urbi, ut qui judex erat omnium criminum in urbe & Provinciis suburbicariis *L. 1. pr. D. de Off. Praef. Urb.* usque ad centesimum lapidem *L. 1. §. 4. D. eod.* Etiam de Senatoribus judicasse jam observatum est. Si quid contingebat ultra centesimum lapidem cognitio erat penes Praesidem Provinciae aut Praefectum Praetorio. Aliquando etiam Prae-



fecto Praetorio res singulari jussu mandabatur, quod passim hic observari licuit. Hic autem facile quis querere posset quid in nostro crimine puniatur, satis enim constat omnes illas artes Magicas ac Mathematicas vanis atque inanibus susurris perfici, nec ullum effectum producere, nisi revera malum venenum datum sit; nemo autem cogitationis poenam patitur *L. 18. D. de Poen.* idque generaliter in criminibus verum esse, nisi specialiter utilitatis publicae causa aliter constitutum sit, more suo solide ac erudite probavit A. Praeses a Bynkersh. *Observ. Lib. 3. cap. 10.* unde sequitur crimen illud non posse merito puniri. At non difficilis est responsio. Primo enim Principes qui in hanc rem leges edidere non putabant haec vana ac inania esse, vel si putabant sua referebat ne id vulgus crederet, ideoque semper serio & tanquam gravissimum crimen illud tractarunt, non modo exitum sed etiam voluntatem puniendo. Secundo ex ipsa ratione juris facile deduci potest haec non debere impunita remanere, etiamsi nullus exitus adsit, pertinet enim hoc crimen ut supra vidimus ad Legem Corneliam de Sicariis, ea vero non tantum animadvertitur in eum qui hominem occidit, sed etiam in eum qui hominis occidendi voluntatem habuit, ut si hujus rei gratia cum telo ambulaverit *L. 1. pr. D. ad Leg. Corn. de Sic.* imo ut ait Paulus *Sent. L. 5. Tit. 23. §. 3.* *Qui hominem occiderit aliquando absolvitur, & qui non occidit ut homicida damnatur. Consilium enim uniuscujusque non fatum puniendum est.* Jam vero qui Magicas artes excercant persuasi sunt, aut saltem aliis persuadere volunt, illis posse alicui mortem aliudve malum infligi, ac eo animo ipfas adhibent; sponte ergo fluit, id genus hominum incidere in casum Legis Corneliae quo voluntas non exitus punitur, nec enim refert quid adhibitum fuerit ad aliquem interficiendum modo de consilio constet. Vir A. a Bynkershoek l. c. putat id expresse in hoc crimine constitutum esse ut voluntas puniatur non exitus, hucque refert *L. 14. D. ad Leg. Corn. de Sic.* Divus Hadrianus in haec verba rescripsit: *In maleficiis voluntas spectatur non exitus*, ibique Maleficia interpretatur de illis Maleficiis quae ita per excellentiam vocantur & de quibus in tota hac Dissertatione agimus.



Haec de Maleficis ac Mathematicis, jam quaedam addamus, de aliis quibusdam qui jure aut injuria ipsis equiparari solent.

## CAPUT QUINTUM.

*De illis qui cum Magis & Mathematicis  
affinitatem quandam habent, aut fal-  
so eo nomine comprehenduntur.*

### §. I.

**U**lpianus in *L. 7. D. de extraord. crimin.* loquitur de *sacculariis* qui vetitas in sacculo artes excercentes partem subducunt partem subtrahunt, illi plus quam fures puniendi sunt, id circoque aut ad tempus in opus dantur publicum, aut fustibus castigantur & dimittuntur, aut ad tempus relegantur. Sed quae nam sint artes illae vetitae non definit Ulpianus, & in illis explicandis admodum breves sunt viri docti. Cujac. *Observ. Lib. 10. cap. 27.* Saccularios definit qui Magicis artibus ex alienis sacculis aut subducunt pecuniam aut subtrahunt. Subducunt nempe vi carminum, subtrahunt nempe manu. Forte non sunt dissimiles ab illis qui hodie *Joueurs de Gobelets* vocantur qui saepe subtilibus manibus attonitos spectatores rebus pretiosis spoliant.

§. II. His proximi sunt *Circulatores*, qui serpentes circumferunt & proponunt *L. ult. D. de extraord. crim.* nullo modo confundendi cum Medicis qui *ᾠροδεῦται* id est *circulatores* vocantur in *L. 6. §. 1. D. de excusat.* & de quibus late egit vir stupendae eruditionis Aegid. Menagius *Amoenit. Jur. cap. 35.* Quinam autem sint nostri *circulatores*, iterum definire praetermisit Jurisconsultus in *d. L. ult. Cicer. ad Fam. Lib. 10. epist.*



*epist. 32. meminit quendam Circulatorem auetionum, Plin. Epist. Lib. 4. epist. 7. in fine Num. .... ut Circulator in foro legeris. Senec. de Benef. Lib. 6. cap. 11. Alter apud proximum circulatorem resedit, & dum vagus & erro vernaculis congregatur & ludit &c., ex istis locis colligi potest, Circulatores esse homines in foro residere adfuetos, ibique multa voce quaedam Populo recitare. At si apud Senecam Vernaculos intelligamus de illis quos supra sic vocari notavimus (cap. 2. §. 10.) ut omnino videtur intelligendum, jam constabit quid sit Circulator, nempe proculdubio ipse Vernaculus; adde quod Tertulian. Apolog. cap. 23. loquitur de Circulatoriis Præstigiis. De illis etiam plura nos docebit Scholiastes Juvenalis ad Sat. 6. v. 583. ubi Poëta insectatur mulieres quae nihil agunt nisi prius consulto Astrologo.*

*Si mediocris erit spatium lustrabit utrumque  
Metarum, & sortes ducet, frontemque manumque  
Præbebit vati crebrum poppysma roganti.*

Ad illa verba & sortes ducet Scholiastes Quod circulatores hoc consueverint adhibere ut delectis sibi locis duobus, eos lustrant, id est circumeant, deinde per eos sortes, id est, Taxillos jactitant: quo exinde quod suae Geneseos signum se accomodaverit, inspiciatur numquid vivet & quando & paucis ex verbis idem conceptis sortes educant suas. Ex istis patet Circulatores etiam frequenter in Circo versari, ibique cuilibet fata sua praedicere solitos fuisse, idque per inspectionem sortium, ex quo divinandi genere hodie fere tota ars Magica & Mathematica Sortilegium vocatur. Multis modis id fiebat, vulgo varios versus aliudve quid simile in urnam conjiciebant, & inde manu Pueri extrahebantur, proutque id eveniebat pro bono vel malo omine habebant. Vid. Cic. De Divin. Lib. 2. cap. 41. id sortes ducere dicebatur, puerique sortilegi vocabantur. Templum etiam erant in quibus specialiter haec excercebantur, veluti sortes Praenestinae & Antiatinae de quibus Sueton. in Tiber. cap. 63. & Caligul. cap. 57. & in templo Veneris Erycinae ut patet ex inscriptione quam ex Sponio adducit Broekkus. ad Tibull. Lib. 1. eleg. 3. v. 11. Aliquando etiam ex nobili autore fortuito



fortuito aperto sortes desumebant, cujus exempla vid. apud Spartian. *in vit. Hadrian. cap. 2. ibiq. Casaubon. & Trebell. Poll. in vit. Divi. Claud. cap. 10. & Lamprid. in Alexand. Sever. cap. 14.* Sed iterum ad Circulatores nostros. Erant ergo scurrae ac Vernaculi qui in Foro aut Circo futura Populo per sortes praedicebant. At inquit Jurisconsultus in *L. ult. de extraord. crim.* Serpentes circumferebant, de eo nihil apud alios, sed videntur Praestigiatores isti ut vulgi admirationem excitarent, serpentes quosdam utcunque sopitos Populo ostendisse, ipsique persuasisse se vi carminum venena posse extinguere. In illos autem si cui ob metum damnum datum sit *pro modo admissi actio dabitur d. L. ult. & merito*, poterant enim facile pueri vel mulieres, metu horum serpentum damnum accipere.

§. III. De Vaticinatoribus supra egimus. Cum illis affinitatem quandam habere videntur *Fanatici*, de quibus etiam mentio fit in jure nostro, sed (saltem quod sciam) tantum circa servos, nempe in *L. 1. §. 9. & 10. D. de Aedilit. Edict.* ubi ita Ulpianus: *Apud Vivianum quaeritur si servus inter Fanaticos non semper caput jactaret, & aliqua profatus esset, an nihilominus hic sanus videretur.* Brisson: *select. Antiq. Lib. 2. cap. 13.* recte observavit per Fanaticos intelligendos Gallos magnae Deum matris Cybelis sacerdotes, qui ita passim vocantur. Illis mos erat semper magnis motibus caput comamque jactare ut melius de Deo pati crederentur, sicque etiam futuris praedicendis se immiscebant. Testis sit Servius *Ad Virg. Aeneid. Lib. 10. v. 220. Mater Deum dicta Cybele ἀπὸ τοῦ κυβιστᾶν τὴν κεφαλὴν id est capitis rotatione*, quod semper Galli motu capitis per furorem comam rotantes ululatu futura pronuntiabant. Idque in omnibus qui futura ex inspiratione Numinis canebant, observare licet, Sic apud Tibul. *Lib. 2. eleg. 5. v. 65.*

*Haec cecinit vates & te sibi Phoebe vocavit,*

*Jactavit fusa sed caput ante coma.*

Sic & apud Virg. *Aeneid. Lib. 6. v. 45.* Ubi magnus ille artifex mire Sibyllae furorem repraesentavit, ita ut meo judicio si-



ne admiratione haec legi nequeant , nec piget ea referre.

*Ventum erat ad limen cum Virgo , Pōscere fata  
Tempus ait. Deus ecce Deus. Cui talia fanti  
Ante fores subito, non vultus, non color unus,  
Nec comptae mansere comae , sed pectus anhelans ,  
Et rabie fera corda tument , majorque videri  
Nec mortale sonans , afflata est numine quando  
Jam propiore Dei.*

Hisce adde versiculum Plautinum *Hariolus fiam capillos pro-*  
*mittam* , quem non addito loco ad verba Tibulli mox laudata  
adducit Scaliger. Sed iterum in viam. Sacra Magnae Matris  
Romae quidem erant recepta , verum quantum ipsius sacer  
dotes infames habiti fuere , omnibus notum est , adeo ut tan-  
tum yilissimae sortis homines istis sacris se immiscuerint. Quæ  
rit itaque Jurisconsultus in *d. L. 1. §. 9. de Aedilit. Edict.* an  
servus qui haec sacra secutus est possit redhiberi , ac respondet  
quod *si id fecerit at non faciat nullum vitium esse , neque eo no-*  
*mine quod aliquando id fecit actio est , sicuti si aliquando febrem*  
*habuit ; si vero in eo permaneret id quidem vitium esse , sed*  
*vitium animi non corporis , ideoque redhiberi non posse quoniam*  
*Aediles de corporalibus vitiis loquuntur , attamen ex empto a-*  
*ctionem admittit.*

§. IV. Sub Titulo de Vaticinatoribus Paulus etiam retulit  
illos qui novas & usu vel ratione incognitas religiones inducunt ,  
itaque & de illis hic quaedam videamus.

Romulus legem tulerat *Deos peregrinos ne colunto* , teste Dyo-  
nis. Halic. *Lib. 2.* Hanc legem secuti Romani , non facile per-  
miserunt ut alii Dei quam qui publice fuere adsciti , publice  
colerentur. Inde saepe in hanc rem quaestiones habitae. Livi-  
us *Lib. 4. cap. 30.* ad annum U. C. 327. refert quod *animos*  
*multiplex religio ; & pleraque externa invasit , novos ritus sa-*  
*crificando , vaticinando inferentibus in domos quibus quæstui sunt*  
*capti superstitione animi. Donec publicus jam pudor ad primo-*  
*res civitatis pervenit , cernentes in omnibus vicis , sacellisque*  
*peregrina atque insolita piacula pacis Deum exposcendae. Da-*  
*tum inde negotium Aedilibus ut animadverterent ne qui nisi Ro-*



*mani Dii, neu quo alio more quam patrio colerentur.* Iterum anno 339 teste eodem Livio *Lib. 25. cap. 1.* ubi late talem inquisitionem refert, tuncque res eo devenit ut M. Atilius Praetor Urbanus edixerit, *ut quicumque libros vaticinos precatio- nesve, aut artem sacrificandi conscriptam haberet, eos libros omnes litterasque ad se ante Calendas Aprilis deferret, neu quis in publico sacrove loco, novo aut externo ritu sacrificaret.* Tertium idem factum in memorabili illa de Bacchanalibus perqui- sitione quam memorat Liv. *Lib. 39. cap. 8. & seqq.* & de qua supra (cap. 2. §. 3.) Haec ita Romani adversus illos qui in religione publice recepta quid novare volebant, rati religio- nem avitam mutari non posse nisi & imperium mutaretur. A- liquanto mitiores se praebuere, iis qui contenti sacra sua privatim colere nihil in publicis mutabant, idque testatur Marcianus in *L. 1. §. 1. D. de Colleg. & corp. Sed religionis causa coire non prohibentur dum tamen per hoc non fiat contra Senatusconsultum, quo illicita collegia arcentur, id est (se- cundum interpretationem A. Praesidis a Bynkershoek de Cult. Relig. Peregr. Dissert. 2. inter Opusc. p. 244.) Convenire licet religionis suae excercendae ergo, etsi publice non receptae dummodo non vetitae.* Vid. quae habet Vir A. l. c. ubi to- tam rem magna eruditione pertractavit.

In eandem sententiam scribit Paulus *Sent. Lib. 5. Tit. 21. §. 2.* quod *qui novas vel usu incognitas religiones inducunt ex qui- bus animi hominum moveantur, honestiores deportantur humi- liores capite puniuntur, nempe puniuntur tantum si inde ho- minum animi moventur, eodem sensu ac Vaticinatores ex civitate expelluntur, ne populares animi turbentur.*

Ab illa clementia soli excepti Christiani, nec mirum, eo- rum religio omnem aliam excludebat, ritusque sacratissi- mos penitus evertibat, adorationem Imperatorii Numinis tanquam impiam rejiciebat vid. Bynk. *De Rel. Per. p. 253.* Christianae religionis fata persequi nec est facile opus nec no- stri instituti, rem omnem magna doctrina & diligentia pere- git Balduinus in *Comment. ad edicta Veter. Princip. de Christ.* Id modo ad nos pertinet quod saepe Magi ac su-  
per-



perstitiosi Christiani vocati sunt & eo nomine coërciti Suet. in *Neron. cap. 16.* eos vocat *Genus hominum superstitionis novae ac Maleficae*, & Tacito *Annal. Lib. 15. cap. 44.* religio Christiana dicitur *exitiabilis superstitio*. Quid de illis senserint Pagani ipsi testantur Christiani Scriptores & inter alios Tertullianus *Apolog. cap. 2.* ubi ait Christianum existimari *omnium scelerum reum, Deorum, Imperatorum, Legum, morum, naturae totius inimicum*; nec parum ad id faciebat quod solerent Christiani *stato die ante lucem convenire cermenque Christo quasi Deo dicere*, ut inquit Plinius in celebri illa de Christianis ad Trajanum epistola *Lib. 10. ep. 97.* Omnes enim coetus antelucanos semper fere detestati sunt Romani. In libris Digestorum nulla nominatim Christianorum fit mentio, cum Justinianus eorum nomen ex fragmentis Paganorum Jurisconsultorum in quibus procul dubio parum honorifice nominabantur, sollicitè sustulerit. Non tamen id adeo accurate executus est ut nec vola nec vestigium supersit. Vidimus jam libros improbatæ lectionis esse libros Christianae fidei in *L. 4. §. 1. D. fam. ercisc.* Quidam ad Christianos etiam referunt rescriptum D. Marci in *L. 30. D. de Poen.* sed jam notavimus id potius esse referendum ad Vaticinatores, & in specie ut videtur ad illum qui motu Cassiano vaticinatus erat. Rectius Balduinus *Comment. ad vet. Princip. edic. p. m. 102.* ad Christianos trahit quod Ulpianus scribit in *L. 1. §. 3. D. de Extraord. cognit.* inter Medicos numerari non debere si quis *incantavit, si imprecatus est, si ut vulgari impostorum verbo utar exorcizavit.* Exorcistas fuisse genus quoddam Ministrorum Ecclesiarum, notum est non tantum ex Historia Ecclesiastica, sed etiam ex jure nostro, eorum enim fit mentio in *L. 24. Cod. Theod. de Episcop. & Cleric.* (quæ est *L. 6. C. eod.*) *L. 121. Cod. Theod. de Decurion.* eorum definitionem tradit Isidor. *Orig. Lib. 7. cap. 12.* *Exorcistæ ex Graeco in Latinum adjuratores sive increpantes vocantur, Invocant enim super catechumenos, vel super eos qui habent spiritum immundum nomen Domini Jesu, adjurantes per eum ut egrediatur ab*



*eis.* Si quis ergo ab istis exorcistis sanatus fuerit non putat Ulpianus id pertinere ad cognitiones de Mercedibus Professorum artium liberalium.

§. V. Christiani vice sua rerum potiti Paganos quiescere non siverunt. Nec tantum adversus eos sed etiam contra illos quos Haereticorum nomine nuncupabant insurrexerunt, an non aliquando supra modum aliis definiendum relinquo. Nullis autem infensiores fuere & Christiani & Pagani, quam Manichaeis. Principes Gentiles severissimas in eos ediderunt leges quia Magiam excercere credebantur, unde in Codice Gregoriano & in Collatione Legg. Mosaic. & Rom. extat Titulus de *Maleficis & Manichaeis*. Nomen ac originem trahunt a quodam *Mane* Persa, eorum sententias variasque species enarrare non est hujus loci. Magicas artes tractare consuevisse probant viri docti ex scriptoribus ecclesiasticis & inter alios ex Epiphanio *adversus Manichaeos Haeres.* 66. n. 18. & 88. Haec procul dubio fuit ratio quare a Diocletiano fuere coerciti, celebri rescripto quod extat in Cod. Gregor. *Lib. 19. Tit. 4. & Collat. LL. Mosaic. & Romanar. Tit. 15. §. 3.* verum adeo lacerum ut desperandum sit, id posse in integrum restitui, ni forte manuscriptum quoddam optimae notae ex Bibliothecarum latebris eruatur. Frustra saltem in illo sanando laborarunt viri quorum monumenta in pretio erunt donec litteris suis constabit honor, Pithoeus, Barthius, Schulting. Bynkershoek. Id unice ex eo notabimus quod Diocletianus jubet, *Manichæorum autores ac principes una cum abominandis scripturis, Severi poenae subjici ita ut flammeis ignibus exurantur, Consentaneos vero, & usque ad eos (Pith. melius leg. adeo) contentiosos capite puniri praecipimus & eorum bona fisco nostro vindicari sancimus.* Haec de humilioribus, si autores sint vivi comburuntur, si tantum *consentanei* id est ejusdem sectae ordinaria capitis poena plectuntur & bona fisco addicuntur. Si vero personae sint honoratae, bona fisco cedunt, ipsi ad metalla damnantur. De tempore quo haec lata est constitutio, nihil liquido statui potest. Vir A. Bynkershoek putat  
latam



latam fuisse anno 298 vel 299, rationes vid. in *Opusc. de Cult Rel. Pereg. Diff. 2. in fin.*

Principes Christiani multas leges in Manichaeos ediderunt quae in utroque Codice reperiuntur. Valentinianus eorum coetus prohibuit *L. 3. Cod. Theod. de Haeret.* eodem anno quo leges de Maleficis quas supra retulimus promulgavit. Idem prohibuit Arcadius *L. 35. eod.* ubi conventus *execrabiles* vocantur, in *L. 65. eod.* ipsi dicuntur *ad imam usque sceleris nequitiam pervenisse.* Minus in eos Principes Christianos quam Paganos saevisse notat Gothofredus, *ad L. 40. eod.* Reliqua de illis petenda ex Codice Justiniano & Theodosiano & eruditissimis Gothofredi commentariis.

F I N I S.



# C O R O L L A R I A.

## I.

*Tutoris datio non est Jurisdictionis ordinariae sed Legitimae.*

## I I.

*Negotiorum gestor ordinario tenetur de culpa levissima.*

## I I I.

*Bonae fidei Possessor habens justum titulum, fructus tam naturales quam industriales percipiendo suos facit.*

## I V.

*Pater filio exheredato recte Tutorem dat.*